



C40
4514



10

1 2 3 4 5 6 7 8 9

20

1 2 3 4 5 6 7 8 9

30

1 2 3 4 5 6 7 8 9

C 40-4514

丁翁之座請大藏及有
家書置武州紫雲山
我微安塔院直房中永
為學者不敢許出院內
當山二世鐵上機譯本



B 64853

印信
印信
印信

印信
印信
印信

印信
印信
印信

憨山老人夢遊集卷三十九

侍者福善 門人通炳日錄

海幢法裔今照今光收藏

憨山老人自序年譜實錄上

印信
印信
印信

世宗肅皇帝嘉靖二十五年丙午

予姓蔡氏父彥高母洪氏生平愛奉觀音大士初
夢大士攜童子入門母接而抱之遂有娠及誕白
衣重胞是年十月己亥十二日丙申己丑時生也
二十六年丁未

予周歲風疾作幾死母禱大士遂許捨出家寄名
於_豆長壽寺遂易乳名和尚

二十七年戊申

予三歲常獨坐不喜與兒戲祖父常謂曰此兒如木椿

二十八年己酉

二十九年庚戌

三十年辛亥

三十一年壬子

予年七歲叔父鍾愛之父母送予入社學一日叔父死停於牀予歸母給之曰汝叔睡可呼起乃呼數聲姍母感痛乃哭曰天耶那裏去也予愕然疑

之間母曰叔身在此又往何處耶母曰汝叔死矣予曰死向甚麼處去遂切疑之未幾次姍母舉一子母往視予隨之見嬰兒如許大乃問母曰此兒從何得入姍母腹中耶母拍一掌云癡子你從何入你娘腹中耶又切疑之由是死去生來之疑不能解於懷矣

三十二年癸丑

予八歲讀書寄食於隔河之親家母誠不許回但經月歸一次一日回戀母不肯去母怒鞭之趕於河邊不肯登舟母怒提頂髻拋於河中不顧而回

於時祖母見之急呼救起送至家母曰此不才兒不滌殺畱之何爲又打逐略無畱念予是時私謂母心狠自是不思家母常隔河流淚祖母罵之母曰固當絕其愛乃能讀書耳

三十三年甲寅

予九歲讀書於寺中聞僧念觀音經能救世間苦心大喜因問僧求其本潛讀之卽能誦母奉觀音大士每燒香禮拜予必隨之一日謂母曰觀音菩薩有經一卷母曰不知也予卽爲母誦一過母大喜曰汝何從得此耶誦經聲亦似老和尚

三十四年乙卯

予十歲母督課甚嚴苦之因問母曰讀書何爲母曰做官予曰做何等官母曰從小做起有能可至宰相予曰做了宰相却何如母曰罷予曰可惜一生辛苦到頭罷了做他何用我想只該做箇不罷的母曰似你不才子只可做箇挂搭僧耳予曰何爲挂搭僧有甚好處母曰僧是佛弟子行徧天下自由自在隨處有供予曰做這箇恰好母曰只恐汝無此福耳予曰何以要福母曰世上做狀元常有出家做佛祖豈常有耶予曰我有此福恐母不

10 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

能捨耳母曰汝若有此福我卽能捨私識之

三十五年丙辰

予十一歲偶見行脚僧數人肩擔瓢笠而來予問母此何人耶母曰挂搭僧也予私喜視之僧至放擔倚樹乃問訊化齋母曰請坐急烹茶具齋飯甚恭敬食罷衆僧起卽荷擔隻手一舉母急避之曰勿謝僧徑去予曰僧何無禮飯齋不謝母曰謝則無福矣予私曰是僧之所以高也切念之遂發出家之志苦無方便路耳

三十六年丁巳

予年十二讀書通文義鄉族咸愛重之居常不樂俗父爲定親立止之一日聞京僧言報恩西林大和尚有大德予心卽欲往從之白父父不聽白母母曰養子從其志第聽其成就耳乃送之是歲十月至寺太師翁一見喜曰此兒骨氣不凡若爲一俗僧可惜也我第延師教讀書看其成就何如時無極大師初開講於寺之三藏殿祖翁攜往謁適趙大洲在一見喜曰此兒當爲人天師也乃撫之問曰汝愛做官要作佛予應聲曰要作佛趙公曰此兒不可輕視當善教之及聽講雖不知言何事

然心憤憤若有知而不能達者時雪浪恩兄長予
一歲先一年依大師出家見予相視而嘻時人以
爲同胞云江南開講佛法自無極大師始少年入
佛法者自雪浪始

三十七年戊午

予十三歲初太師祖擇諸孫有學行者俊公爲予
師先授法華經四月成誦

三十八年己未

予年十四流通諸經皆能誦太師翁曰此兒可教
不可誤之也遂延師能文者教之

三十九年庚申

予年十五太師翁乃請先生教習舉子業初卽試
其可教乃令四書一齊讀是年多病

四十年辛酉

予年十六是歲四書完背之首尾不遺一字
四十一年壬戌

予年十七是歲講四書讀易并時藝及古文辭詩
賦卽能詩述文一時童子推無過者

四十二年癸亥

予年十八時督學使者專講道學以童生爲訶童

動隨數十逐隊而謁亦有因之而倖進者予大恥之遂欲棄所業是歲以病辭不入館

四十三年甲子

予年十九同會諸友皆取捷有勸予往試者時雲谷大師正法眼也住栖霞山中太師翁久供養往來必欵留旬月予執侍甚勤適雲大師出山聞有勸予之言恐有去意大師力開示出世參禪悟明心地之妙歷數傳燈諸祖及高僧傳命予取看予檢書笥得中峰廣錄讀之未終軸乃大快歎曰此予心之所悅也遂決志做出世事卽請祖翁披荆

盡焚棄所習專意叅究一事未得其要乃專心念佛日夜不斷未幾一夕夢中見阿彌陀佛現身立於空中當日落處覩其面目光相了了分明予接足禮哀戀無已復願見觀音勢至二菩薩卽現半身自此時時三聖炳然在目自信修行可辦也是年冬本寺禪堂建道場請無極大師講華嚴玄談予卽從受具戒隨聽講至十玄門海印森羅常住處恍然了悟法界圓融無盡之旨切慕清涼之爲人因自命其字曰澄印請正大師曰汝志入此法門耶因見清涼山有冬積堅冰夏仍飛雪曾無炎

暑故號清涼之語自此行住冰雪之境居然在目
矢志願住其中凡事無一可心者離世之念無刻
忘之矣

四十四年乙丑

予年二十是歲正月十六日太師翁入寂師翁於
前年除日畢集諸眷屬曰吾年八十有三旦暮行
矣我度弟子八十餘人無一持我業者乃撫予背
曰此子我望其成人今不能矣是雖年幼有老成
之見我死後房門大小事皆取決之勿以小而易
之也衆唏嘘受命新歲七日師翁具衣徧巡察各

辭別衆咸訝之又三日卽屬後事示微疾舉藥不
肯進乃曰吾行矣藥奚爲乃集衆念佛五晝夜手
提念珠予擁於懷端然而逝以師翁生平持金剛
經臨終亦不輟也太師翁爲報恩官住三十年居
方丈及入滅至三月十八日而方丈火衆皆歎異
是年冬十月雲谷大師建禪期於天界集海內名
德五十三人開坐禪法門大師極力拔予往從少
師翁聽之乃得預會初不知用心之訣甚苦之乃
拈香請益大師開示審實念佛公案從此參究一
念不移二月之內如在夢中了不見有大衆亦不

知有日用事一衆皆以予爲有志初不數日以用心太急忽發背疽紅腫甚巨大師甚難之予搭袈裟哀切懇禱於韋駄前曰此必冤業索命債耳願誦華嚴經十部告假三月以完禪期後當償之至後夜倦極上禪牀則熟睡開靜亦不知及起則忘之矣天明大師問恙何如予曰無恙也及視之已平復矣一衆驚歎是故得完一期及出亦如未離禪座時卽行市中如不見一人時皆以爲異江南從來不知禪而開創禪道自雲谷大師始少年僧之習禪者獨予一人時寺僧服飾皆從俗多豔色

予盡棄所習衣服獨覓一衲被之見者以爲怪
四十五年丙寅

予年二十一自禪期出是年二月十八日午時大雨如傾盆忽大雷自塔而下火發於塔殿不移時大殿焚至申酉時則各殿畫廊一百四十餘間悉爲煨燼時予少祖爲住持及奏聞

旨下法司連逮同事者十八人合寺僧恐株連各各逃避而寺執事僧無可與計事者予挺身力採躬負鹽菜送獄中以供之寺至刑部相去二十里往來不倦者三月且多方調護諸在事者竟免死時

與雪浪恩公俱決興復之志且曰此大事因緣非
具大福德智慧者未易也你我當拌命修行以待
時可也是時卽發遠遊志頃之少祖尋入滅太祖
之房門無支持者先是太師翁入滅無儲畜喪事
皆取貸不資故多欠負卽析居知必不能保予思
太師翁遺命乃設法盡償其負貸餘者分諸弟子
各執業房門竟以存是年冬從無極大師聽法華
經於天界寺因志遠遊每察方僧求可以爲侶者
久之竟未得一日見後架精潔思淨頭必非常人
乃訪之及見特一黃腫病僧每早起事已悉辦不

知何時酒埽也予故不寐竊經行廊下偵之當衆
方放參時卽已收拾畢矣又數日見不潔乃不見
其人問之執事曰淨頭病於客房也予往視其狀
不堪問曰師安否曰業障身病已難支饑病更難
當予問何故曰每見行齋食恨不俱放下予笑曰
此久病思食耳是知其人真因料理果餅袖往視
之間其號曰妙峰爲蒲州人予卽相期結伴同遊
後數日再視之則不見予心知其人恐以予累故

潛行耳

隆慶改元丁卯

予年二十二特舉虛谷忠公爲寺住持以救傾頽
比爲回祿事常住負貸將千金皆經予手衆計無
所處予設法定限三年盡償之是年奉部檄本寺
設義學敎僧徒請予爲教師授業行童一百五十
餘人予因是復視左史諸子古文辭

二年戊辰

予年二十三是年謝館事復館於高座以房門之
累然也

三年己巳

予年二十四是年金山聘館居一年

四年庚午

予年二十五是年仍應金山聘

五年辛未

予年二十六予以本寺回祿決興復之志將修行
以養道待時是年遂欲遠遊始同雪浪恩兄遊廬
山至南康聞山多虎亂不敢登遂乘風至吉安遊
青原見寺廢僧皆蓄髮慨然有興復之志乃言於
當道選年四十以下者盡剃之得四十餘人夏自
青原歸料理本師業安頓得宜冬十一月卽一鉢
遠遊將北行時雪浪止予恐不能禁苦寒姑從吳

越多佳山水可遊目耳予曰吾人習氣戀戀軟緩必至不可施之地乃易制也若吳越枕席間耳遂一鉢長往

六年壬申

予年二十七初至揚州大雪阻之且病作久之乞食於市不能入門自忖何故急自省曰以腰纏少有銀二錢可恃耳乃見雪中僧道行乞不得者即盡邀於飲店以銀投之一餐而畢明日上街入一二門乃能呼遂得食因自喜曰吾力足輕萬鍾矣銘其鉢曰輕萬鍾之具銘其衲曰輕天下之具乃

爲之銘曰爾委我以形我託爾以心然一身固因之而足萬物實以之而輕方將曳長風之袖披白雲之襟其舉也若鴻鵠之翼其逸也若潛龍之鱗逍遙宇宙去住山林又奚銜夫朱紫之麗唯取尚乎霜雪之所不能侵是年秋七月至京師無投足之地行乞竟日不能得日暮至西太平倉茶筭僅一餐投宿河漕遺教寺明日左司馬汪公伯玉知予至乃邀之以與次公仲淹爲社友故耳因得寓所旬日卽謁摩訶忠法師隨往西山聽妙宗鈔有西山懷恩兄詩期罷摩訶畱過冬聽法華唯識請

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

安法師爲說因明三支比量十一月妙峰師訪予至師長鬚髮衣褐衣先報云有鹽客相訪及入門師卽問還認得麼予熟視之見師兩目忽記爲昔天界疴淨頭也乃曰認得師曰改頭換面了也予曰本來面目自在相與一笑不暇言其他第問所寓曰龍華明日過訊夜坐乃問其狀何以如此師曰以久住山故髮長未翦適以檀越山陰殿後修一梵宇命請內藏故來耳問予狀乃曰特來尋師且以觀光輦轂一參知識以絕他日妄想耳師曰別來無時不思念將謂無緣今幸來某願伴行乞禮侍立請益師開示向上數語而別

萬曆元年癸酉

予年二十八春正月往遊五臺先求清涼傳接蹠遊之至北臺見有憨山因問其山何在僧指之果奇秀默取爲號詩以志之有遮莫從人去聊將此息機之句以不禁冰雪苦寒遂不能畱復入京東

遊行乞至盤山於千象峪石室見一僧不語予亦不問卽相與拾薪汲水行乞汪司馬以書訪之曰恐公作東郊餓夫也及秋復入京以嶺南歐楨伯先數年未面寄書今爲國博急欲見予故歸耳

二年甲戌

予年二十九春遊京西山當代名士若二王二汪及南海歐楨伯一時俱集都下一日訪王長公鳳洲相見以予少年易之予傲然賓主公卽諄諄教以作詩法予瞠目視之竟無一言而別公不憚乃對次公麟洲言之明日次公來訪一見卽曰夜來

家兄失却一隻眼予曰公具隻眼否公拱曰小子相見了也相與大笑歸謂其兄曰阿哥輸却維摩了也因以詩贈予有可知王逸少名理讓支公之句一日汪次公與予同居看左傳因謂予曰公天資特異大有文章氣概家伯子當代文宗也何不執業以成一家之名乎予笑而唾曰畱取老兄膝頭他日拜老僧受西來意也次公大不悅歸告司馬公公曰信哉予觀印公道骨他日當入大慧中峰之室是肯以區區文字爲故第恐浮遊爲誤耳見予與次公扇頭詩有身世蜩雙翼乾坤馬一毛

之句乃示次公曰此豈文字僧耶他日特設齋請予與妙師同坐公謂予曰禪門寥落大可憂小子切念之觀公器度將來成就不小何以浪遊爲予曰貧道特爲大事因緣參訪知識今第遊目當代人物以了他日妄想耳非浪遊也且將行矣公曰信然予觀方今無可爲公之師者若無妙峰則無友矣予曰昔已物色於衆中曾結同參之盟故北來相尋不意偶遇於此公曰異哉二公若果行小子願津之時妙師取藏經回司馬公因送勘合二道又爲文以送予一日公速予至問曰妙峰行矣

公何不見別予曰姑徐行公曰予知公不欲隨人腳跟轉耳殊大不然古人不羞小節而恥功名不顯於天下但願公他日做出法門一段光明事業又何以區區較去就哉予感而拜謝遂決行卽往視妙師已載乘矣見予至問曰師行乎曰行矣卽登車未別一人而去秋八月渡孟津見武王觀兵處有詩弔之曰片石荒碑倚岸頭當年曾此會諸侯王綱直使同天地應共黃河不斷流過夷齊扣馬地弔曰棄國遺榮意已深空餘古廟柏森森首陽山色清如許猶是當年扣馬心遂入少林謁初

1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

祖時大千潤宗師初入院予訪之未遇出山觀洛陽古城焚經臺白馬寺卽追妙師九月至河東會山陰至遂畱結冬時太守陳公延妙師及予意甚勤爲刻肇論中吳集解予校閱向於不遷論旋嵐偃岳之旨不明切懷疑久矣今及之猶罔然至梵志自幼出家白首而歸鄰人見之曰昔人猶在耶志曰吾似昔人非昔人也恍然了悟曰信乎諸法本無去來也卽下禪牀禮佛則無起動相揭簾立階前忽風吹庭樹飛葉滿空則了無動相曰此旋嵐偃岳而長靜也至後出遺則了無流相曰此江

河競注而不流也於是去來生死之疑從此冰釋乃有偈曰死生晝夜水流花謝今日乃知鼻孔向下明日妙師相見喜曰師何所得耶予曰夜來見河邊兩箇鐵牛相鬪入水去也至今絕消息師笑曰且喜有住山本錢矣未幾山陰請牛山法光禪師至予久慕之相見喜得坐叅也與語機相契請益開示以離心意識叅出凡聖路學深得其旨每見師談論出聲如天鼓音是時予知悟明心地者出詞吐氣果別也深服膺其人一日袋中搜得予詩讀之歎曰此等佳句何自而得耶復笑曰佳則

佳矣那一竅欠通在予曰和尚那一竅通否師曰三十年拿龍捉虎今日草中走出兔子來下一跳予曰和尚不是拿龍捉虎手師拈拄杖才要打予卽把住以手捋其鬚曰說是兔子恰是蝦蟆師一笑休去師一日曰公不必他往願同老伏牛是所望也予曰觀師佛法機辯不減大慧見居常似有風顛態吟哦手口無停時謂何師曰此我禪病也初發悟時偈語如流日夜不絕自是不能止遂成病耳予曰此病初發時何以治之師曰此病一發若自看不破須得大手眼人痛打一頓令其熟睡

覺時則自然消滅矣我初恨其無毒手耳歲暮師知予新正卽往五臺乃以詩送之有雲中獅子騎來看洞裏潛龍放去休之句問曰公知否予曰不知師曰要公不可捉死蛇耳予領之向來禪道久無師匠及見光師始知有宗門作略山陰國主問予二親在乃贈二百金爲終養資予謝曰貧道初行脚自救不了又安敢累二親乎因讓致光師

三年乙亥

予年三十正月自河東同妙師上五臺過平陽師之故鄉也師以少貧值歲饑父母死葬無殮具至

是山陰與一二當道助之予爲卜高敞地爲合葬作墓誌師俗姓續居平陽東郭蓋春秋續鞠居之後也太守胡公號順菴東菴人聞予至寓城外欲一見不可得及予行公送郵符予曰道人行脚有草履耳焉用此公益重及予行公後追之至靈石乃見同至會城畱語數日差役送至臺山於二月望日寓塔院寺大方主人爲卜居北臺之龍門最幽峻處也以三月三日於雪堆中撥出老屋數椽以居之時見萬山冰雪儼然夙暮之境身心洒然如入極樂國未幾妙峰往遊夜臺予獨住此單提

一念人來不語目之而已久之視人如杌直至一字不識之地初以大風時作萬竅怒號水消澗水流激奔騰如雷靜中聞有聲如千軍萬馬出兵之狀甚以爲喧擾因問妙師師曰境自心生非從外來聞古人云三十年聞水聲不轉意根當證觀音圓通溪上有獨木橋予日日坐立其上初則水聲宛然久之動念卽聞不動卽不聞一日坐橋上忽然忘身則音聲寂然自此衆響皆寂不復爲擾矣予日食麥麩和野菜以合米爲飲湯送之初入送米三斗半載尚有餘一日粥罷經行忽立定不見

身心唯一大光明藏圓滿湛寂如大圓鏡山河大地影現其中及覺則朗然自覓身心了不可得卽說偈曰瞥然一念狂心歇內外根塵俱洞徹翻身觸破太虛空萬象森羅從起滅自此內外湛然無復音聲色相爲障礙從前疑會當下頓消及視釜已生塵矣以獨一無侶故不知久近耳是年夏雪浪兄北來看予至臺山不禁其寒楚信宿而別冬結一板屋以居

四年丙子

予年三十一春三月蓮池大師遊五臺過訪畱數

日夜對談心甚契是年予發悟後無人請益乃展楞嚴印證初未聞講此經全不解義故今但以現量照之少起心識卽不容思量如是者八閱月則全經旨趣了然無疑秋七月平陽太守胡公轉鴈平兵備入山相訪靜室中唯餐燕麥餚餚野菜蘿耳時下方正酷熱驂從到澗中敲冰嚼之公見曰別是一世界也吾到此世念如此冰耳是年冬十月塔院主人大方被誣訟本道擬配遞還俗叢林幾廢廬山徹空禪師來與予同居適見其事大苦之予曰無傷也遂躬謁胡公冒大雪往及見胡公

欣然曰正思山中大雪難禁已作書遣迎師適來誠所感也然竟解釋主人道場以全固畱過冬朝夕問道爲說緒言開府高公移鎮代郡聞予在署中乃謂胡公云家有園亭多題詠欲求高人一詩胡公諾之對予言予曰我胸中無一字焉能爲詩乎力拒之胡公乃取古今詩集置几上發予詩思予偶揭之方構思忽機一動則詩句迅速不可遏捺胡公出堂回則已落筆二三十首矣予忽覺之曰此文字習氣魔也卽止之取一首以塞白然機不可止不覺從前所習詩書辭賦凡曾入目者一

時現前逼塞虛空卽通身是口亦不能盡吐更不知何爲我之身心也默之自視將欲飛舉之狀無奈之何明日胡公送高公去予獨坐思之曰此正法光禪師所謂禪病也今在此中誰能爲我治之者無已獨有熟睡可消遂閉門強臥初甚不能久之坐忘如睡童子敲門不開推之不應胡公歸取問之乃令破窓入見予擁衲端坐呼之不應撼之不動先是書室中設佛供案有擊子胡公拈之間曰此物何用予曰西域僧入定不能覺以此鳴之卽覺矣公忽憶之曰師入定耶疾取擊子耳邊鳴

數十聲予始微微醒覺開眼視之則不知身在何處也公曰我行師卽閉門坐今五日矣予曰不知也第一息耳言畢默坐諦觀竟不知此是何所亦不知從何入來及回觀山中及一往行脚一一皆夢中事耳求之而不得則向之徧空擾擾者如雨散雲收長空若洗皆寂然了無影像矣心空境寂其樂無喻乃曰靜極光逼達寂照舍虛空却來觀世間猶如夢中事佛語真不吾欺也歲暮擬新正還山乃爲胡公言臺山林木苦被姦商砍伐菩薩道場將童童不毛矣公爲具疏題請大禁之自後

國家修建諸刹皆仗所禁之林木否則無所取材矣
五年丁丑

予三十二歲春自鴈門歸因思父母罔極之恩且念於法多障因見南岳思大師發願文遂發心刺血泥金寫大方廣佛華嚴經一部上結般若勝緣下酬罔極之恩以是年春創意先是慈聖聖母以保國選僧誦經予僭列名至是

上聞書經卽賜金紙以助明年四月書經起徹空師遊匡山有詩十首送之

六年戊寅

予年三十三刻意書經無論點畫大小每落一筆念佛一聲遊山僧俗至者必令行者通說予雖手不輟書然不失應對凡問訊者必與談數語其高人故舊必延坐禪牀對談不失亦不妨書對本臨之亦不錯落每日如常略無一毫動靜之相鄰近諸老宿竊以爲異率數衆來驗故意攬擾及書罷讀之良信因問妙師曰印師何能如此耶妙師曰吾友入此三昧純熟耳予自住山至書經屢有嘉夢初一夕宿入金剛窟石門榜大般若寺及入則見廣大如空殿宇樓閣莊嚴無比正殿中唯大牀座見清涼大師倚臥牀上妙師侍立於左予急趨入禮拜立右聞大師開示初入法界圓融觀境謂佛刹互入主伴交參往來不動之相隨說其境卽現覩於目前自知身心交參涉入示畢妙師問曰此何境界大師笑曰無境界境界及覺後自見心境融徹無復疑礙又一夕夢自身履空上升高高無極落下則見十方迴無所有唯地平如鏡琉璃瑩徹遠望唯一廣大樓閣閣量如空閣中盡世間所有人物事業乃至最小市井鄙事皆包其中往來無外閣中設一高座紫赤燄色予心爲金剛寶

座其閣莊嚴妙嚴不可思議予歡喜欲近心中思惟如何清淨界中有此雜穢耶纔作此念其閣卽遠尋復自思曰淨穢自我心生耳其閣卽近頃之見座前侍列衆僧身最高大端嚴無比忽有一少年比丘從座後出捧經一卷而下授予曰和尚卽說此經特命授汝予接之展視乃金書梵字不識也遂懷之因問和尚爲誰曰彌勒予喜隨比丘而上至閣陛瞑目歛念而立忽聞磬聲閉目視之則見彌勒已登座矣予卽瞻禮仰視其面見耀紫金色世無可比者禮畢自念今者特爲我說則我爲

當機遂長跪取卷展之聞其說曰分別是識無分別是智依識染依智淨染有生死淨無諸佛至此則身心忽然如夢但聞空中音聲歷歷開明心地不存一字及覺恍然言猶在耳也自此識智之分了然心目矣且知所至乃兜率天彌勒樓高耳又一夕夢僧來報云北臺頂文殊菩薩設浴請赴隨至則入一廣大殿堂香氣充滿侍者皆梵僧卽引至浴室解衣入浴見有一人先在池中視之爲女子也予心惡不欲入其池中人故汎其形則知爲男也乃入共浴其人以手摩水澆予從頭而下灌

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

入五內如洗肉桶五臟一一蕩滌無遺止存一皮
如琉璃籠洞然透徹時則池中人呼茶見一梵僧
擎髑髏半邊如剖瓜狀視之腦髓淋漓心甚厭之
其僧乃以手指剗取示予曰此不淨耶卽入口噉
之如是躡取隨噉其甘如飴腦已食盡唯存血水
其池中人曰可與之僧乃授予予接而飲之其味
如甘露也飲而下透身毛孔一橫流飲畢梵僧搓
背大拍一掌予卽覺時則通身汗流如水五內洞
然自此身心如洗輕快無喻矣如是者吉兆居多
總之皆與諸聖酬酢常聞佛言常有是好夢

七年己卯

予年二十四是年秋京都建大慈壽寺完初

聖母爲薦

先帝保 聖躬欲於五臺修塔院寺舍利寶塔 諭
執政以爲臺山去京遠遂上附京吉地建大慈
壽寺是年工完覆奏

聖母以爲未滿臺山之願諭

皇上仍遣內官帶夫匠三千人來山修造是時

朝廷初作佛事內官初遣於外恐不能卒業有傷法

夢遊錄卷三十一

三

門予力調護始終無恙

八年庚辰

予年三十五是年特

旨天下清丈田糧寸土不遺臺山從來未入版額該
縣姦人蒙蔽欲飛額糧五百石於臺山屢行文查
報地土合山叢林靜室無一人可安者自此臺山
爲狐窟矣諸山耆舊集白予予安之曰諸師弟無
憂緩圖之予於是宛轉設法具白當道竟免清丈
未加升合臺山道場遂以全

九年辛巳

予年三十六是年建無遮會初妙師亦刺血書華
嚴經與予同願欲建一圓滿道場名無遮會妙師
募化錢糧畢集京中請大德僧五百衆其道場事
宜俱備適

皇上有旨祈

皇嗣遣官於武當

聖母遣官於五臺卽於本寺予以爲沙門所作一切
佛事無非爲國祝釐陰翊 皇慶今祈 皇儲
乃爲國之本也莫大於此者願將所營道場事
宜一切盡歸併於求儲一事不可爲區區一已之
名也妙師意不解

上遣內使亦不解事但以阿附爲心予大不然乃力爭忤之竟從予議頃之江南妖人作難忌者即欲借此中傷以破道場然以爲國求儲之題目竟保全始終無虞是年修塔成予卽以金書華嚴經安置塔藏有願文一卷予自募造華藏世界轉輪藏成爲建道場於內應用供具器物齋糧果品一切所需妙師在京若罔知皆予一力經營九十月夜目不交睫及十月臨期妙師率所請五百餘僧一日畢集內外千人其安居供具茶飯齋食條然不失不亂亦不知所從出觀者莫不駭然初開啓佛力加被也

十年壬午

予三十七歲是春三月講華嚴玄談百日之內常住上牌一千衆十方雲集僧俗每日不下萬衆一食如坐一堂不雜不亂不聞傳呼剝啄之聲皆予一人指揮餘無措目者智者不知所以然也生平精力益竭於此三月會罷盡庫內所餘一應錢糧

約可萬計盡行封付本寺主者以爲常住予與妙師一鉢飄然長往矣妙師往蘆茅予以疾往真定障石巖調養作詩一首有削壁天應隘日斷崖無路只飛梯之句是年八月皇子生予復之京西中峰寺作重刻中峰廣錄序結冬水齋於石室十一年癸未

予年三十八春正月水齋畢然以臺山虛聲謂大名之下難以久居遂蹈東海之上始易號慈山時則不復知有澄印矣始予爲本寺回祿志在興復故修行以約緣然居臺山八年頗有機會恐遠失

時故隱居東海此本心也夏四月八日至牢山初妙師別時以予不能獨行乃命法屬德宗爲侍者予初因閱華嚴疏菩薩住處品云東海有處名那羅延窟從昔以來諸菩薩衆於中止住清涼疏云梵語那羅延此云堅牢卽東海之牢山也禹貢青州登萊之境今有窟存焉予因慕之遂特訪至牢山果得其處蓋不可居乃探山南之最深處背負衆山面吞大海極爲奇絕信非人間世也地名觀音菴蓋古刹也唯廢基存焉考之乃元初七真出於東方假世祖威福多占佛寺改爲道院及世祖

西征回僧奏聞多命恢復唯牢山僻居海上故未及之耳予喜其地幽僻真逃人絕世之所志願居之初掩片席於樹下七閱月後得土人張大心居士爲誅茅結廬以居入山期年人無往來心甚樂也時卽墨靈山寺有桂峰法師一方眼目也喜得相與

十二年甲申

予年三十九秋七月

聖母以五臺祈嗣之勞訪求主事三人乃大方妙峰與予也二師已至受賜獨訪予不得因力求之

乃命舊主人龍華寺住持瑞菴親訪之公知予在海上乃杖策而至具宣慈旨某懇謝曰倘蒙聖恩容老山海受賜多矣又何求其他公覆報聖意不已尋卜地建寺於西山隨遣內使至期以必往予竟謝不就中使回報以居山堅臥之志聖意憐之間無房舍卽發三千金仍遣前使送至以修菴居及至予力止之曰我茅屋數椽有餘樂矣何用多爲使者強之不敢覆

命予曰古人有矯詔濟饑之事今山東歲凶何不廣聖慈於饑民乎乃令僧領來使徧散各府之僧道孤

10

1

2

3

4

5

6

7

8

9

20

1

2

3

4

5

6

7

8

9

30

1

2

3

4

5

6

7

8

9

老獄囚各取所司印冊繳報

聖情大悅感歎不已及後予罹難下鎮撫鞠予數用內帑金予對以請查內庫支籍

上查止此濟饑一事餘無一毫

上意竟解

十三年乙酉

予年四十東人從來不知僧予居山中則黃氏族最大諸子漸漸親近方今所云外道羅清者乃山下之城陽人外道生長地故其教徧行東方絕不知有三寶予居此漸漸攝化久之凡爲彼師長者

率衆來歸自此始知有佛法乃予開創之始也

十四年丙戌

予年四十一是年頒藏經先

國初刻藏有此方撰述諸經未入藏者

今上聖母命補入之刻完

皇上敕頒十五藏散施天下名山首以四部施四邊境東海牢山南海普陀西蜀峨嵋北邊蘆芽時聖母以臺山因緣且數召予不至賜亦不受乃以藏經一部首送東海初未知也及至空山無可安頓撫按行所在有司供奉予見有

敕命乃詣京謝 恩比蒙

聖慈命合眷各出布施修寺安供請 命名曰海印
 寺予在京聞達觀禪師訪予於海上卽趨歸兼程
 追之值師出山尋卽同回盤桓兩旬贈予詩有閑
 來居海上名誤落山東之句是年冬十一月予自
 辛巳以來率多勞動未得寧止故多疲倦至今禪
 室初就始得安居身心放下其樂無喻一夕靜坐
 夜起見海湛空澄雪月交光忽然身心世界當下
 平沉如空華影落洞然壹大光明藏了無一物卽
 說偈曰海湛澄空雪月光此中凡聖絕行藏金剛
 眼突空華落大地都歸寂滅場卽歸室中取楞嚴
 印正開卷卽見汝身汝心外及山河虛空大地咸
 是妙明真心中物則全經觀境了然心目隨命筆
 述楞嚴懸鏡一卷燭才半枝已就時禪堂方開靜
 卽喚維那入室爲予讀之自亦如聞夢語也

十五年丁亥

予年四十二是年修造殿宇始開堂爲衆說戒自
 是四方衲子日益至爲居士作心經直說是年秋
 胡中丞公請告歸田乃攜其親之子送出家爲侍
 者命名福善

十六年戊子

予年四十三時學人讀予楞嚴懸鏡請曰此經心觀具明第未全消文字恐後學不易入願字字消歸觀心則莫大之法施也予始創意述通議已立大旨然猶未屬稿

十七年己丑

予年四十四是年閱藏爲衆講法華經起信論予自別五臺時有省親之心且恐落世諦也姑自驗之一夕靜坐忽開眼有偈曰煙波日日浸寒空魚鳥同遊一鏡中昨夜忽沈天外月孤明應自混驪

龍乃急呼侍者曰吾今可歸故鄉見二老矣先是爲報恩寺乞請大藏經一部冬十月至京請藏上卽命送賚行十一月至龍江本寺寶塔放光連日及迎經之日塔光如橋向北迎經僧自光中行及安經建道場光相日日不絕瞻禮者日萬餘人以爲希有之瑞老母聞予至先遣人候問何日到家予曰我爲朝廷事非爲家也若老母能相見歡喜如未別時止可信宿否則我不歸矣老母聞之曰再生相見歡喜不了那更有悲一面即可况兩宿耶及予歸老

母相見欣然絕倒予大以爲異及夜坐族中長者問從船來陸來老母應聲曰何問從船來陸來問者曰從何處來老母曰從空中來予驚曰怪得當時老婆子能捨我也因問老母曰別後想我否母曰安得不想予曰母何以自遣母曰始而不知既知爾在五臺因問師家五臺在何處曰在北斗之下卽令郎住處也我自此夜禮北斗稱菩薩名則不復想矣今謂你死則不拜亦絕想矣今見爾乃化身來也予明日祭祖塋爲二親卜得葬穴時老父已八十予戲曰今日活埋老子省他日又來也

予把鑊斫地老母奪之曰老婆婆自埋又何煩人連斫數十下三日告別老母歡然如故未嘗蹙眉予始知老母非尋常也卽墨有黃生納善字子光者乃今大司公之弟也初予至海上時年十九歲卽歸依請益授以楞嚴二月成誦從此齋素雖父母責之不異其心切志叅究脇不至席時予南歸光私念曰吾生邊地長劫不聞三寶名今幸遇大善知識爲不請友倘不回吾輩失依怙矣乃對觀音大士破臂然燈供養求大士保予早歸自後火瘡發痛日夜危坐持觀音大士名號三月乃愈愈

時見瘡痕結一大士像眉自身衣冠然如畫卽其母妻亦未知也恒求出家予絕不聽乃曰弟子打箇筋斗來師又何能止我乎是知箋戾車地未嘗斷佛種也初予以重修本寺志居臺山事已有機但以動至數十萬計未易言故待時於海上至是機將熟乃借送大藏因緣回南都具得本寺始末回覆命具奏

聖母且云工大費鉅難輕舉願乞

聖母日減膳羞百兩積之三年事可舉十年工可成
聖情大悅卽 命於是年十二月儲積始

十八年庚寅

予年四十五是年殿宇成春爲

聖母代書法華經時有鄉宦欲謀道場者乃搆方外黃冠假稱占彼道院聚集多人訟於撫院開府李公先具悉其事痛恨之下送萊州府窮治其狀予親聽理力拯之無賴數百衆作閔於府城有匡人之圍時有隨侍二人予斥之他往乃獨徐行其中爲首一人持銅牌有利刃出其鞘鼓舞予前欲殺予予笑視之曰爾殺人何以自處其人氣索卽收牌刀圍行城外二里許將分路狂衆疑彼爲首者

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

有利於予卽欲毆之予默計彼衆一鼓則其人危矣奈何乃躊躇將別卽拉狂首者同至寓處閉門解衣磅礴談笑自若取瓜果共啖之時滿市喧云方士殺僧矣太守聞之卽遣多役並捕之彼衆惶懼皆叩首求解免予曰勿懼亦勿辯第聽予言何如耳及至太守問曰狂徒殺僧耶予曰未也來捕時僧方與彼爲首者同食瓜果耳守曰何以作開予曰市喧耳太守悟乃令地方盡驅之狂衆不三日盡拘之也太守悟乃令地方盡驅之狂衆不三日盡行解散由是此事遂寧是歲作觀老莊影響論

十九年辛卯

予年四十六歲是年

聖母造檀香毘盧佛像建大殿是年秋門人黃子光坐脫

二十年壬辰

予年四十七是年秋七月予至京訪達觀禪師於上方晉時有琬公慮三災壞劫無佛法乃刻石經藏石室其塔院爲僧所賣師贖之欲得予作記予適至師大喜及見卽同過石經山乃爲作琬公塔院記及重藏舍利記并前所作有海印稿時與達

師相對盤桓四十晝夜爲生平之奇
二十一年癸巳

予年四十八是年山東大饑死者載道山中所儲
齋糧盡分賑近山之民不足又乘便舟至遼東糴
豆數百石以濟之由是邊山四社之民無一饑死
者

二十二年甲午

予年四十九是年春三月山東開府鄭崑崖公入
山見訪問法爲說方便語冬十月入賀
聖節至京畱過歲請說戒於慈壽寺時予以修本寺

因緣知

聖母儲已厚乃請舉事時
上以倭犯朝鮮方議往討姑徐徐乃寢

從京師回

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

慈山老人夢遊集卷四十

侍者福善 門人通炯日錄 海幢法裔今照今光收藏

慈山老人自序年譜實錄下

二十三年乙未

予年五十春正月予從京師回海上卽罹難初爲欽頒藏經遣內使四送之其人先至東海先是上惜財素惡內使以佛事請用太煩時內庭偶以他故觸

聖怒將及

聖母左右大臣危之適內權貴有忌送經使者欲死

之因乘之以發難遂假前方士流言令東廠番役
扮道士擊登聞鼓以進
上覽之大怒下逮以有送經因緣故併及之予聞報
乃謂衆曰佛爲一衆生不捨三途今東海蔑戾車
地素不聞三寶名今予教化十二年三歲赤子皆
知念佛至若捨邪歸正者比鄉比戶也予願足矣
死復何憾第以重修本寺志未酬可痛心耳乃離
卽墨城中士民老小傾城而出涕泣追送足見人
心之感化也及至京奉

旨下鎮撫司打問執事者先受 風旨欲盡招追向

聖母所出諸名山施資不下數十萬計苦刑拷訊予
曰某愧爲僧無以報

國恩今安惜一死以傷

皇上之大孝乎卽曲意妄招網利奉

上意以損綱常殊非臣子所以愛君之心也其如青
史何以死力抵之止招前衆布施七百餘金

上查內支簿及前山東代賑之冊籍

上意遂解由是母子如初及擬上蒙

聖恩矜察坐以私創寺院遣戍雷州予以是年三月
下獄京城諸刹皆爲誦經禮懺保護衲子中有然

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

香煉臂水齋持呪以加護之者安肅鄭大司馬範
溪公子在金吾素未相識特設燕會在朝縉紳請
救以至涕泣訴其無妄一時人心之爲法如此在
獄八閱月供饋者唯侍者福善一人冬十月發遣
南行朝士大夫多襃服策蹇相送以津濟者出都
日福善同衲子二三人隨行十一月至南京江上
別老母作母子銘攜孤姪可久往初與達觀師於
石經山因思禪門寥落謂曹溪禪源也必源頭壅
閼乃志同往以濬之達師先往候於匡山予被難
時師正居天池聞報大驚曰憇公已矣則曹溪之

願未了也師遂先至曹溪回至聊城聞予將出遂
回金陵以待予至則相別於江中旅泊菴中師意
欲力爲白其枉予曰君父之命臣子之事無異也
况定業乎師幸勿言臨岐把臂曰在天池聞師難
卽對佛許誦法華經百部以保無虞我之心師之
舌也予唯唯謝別師爲作逐客說

二十四年丙申

予年五十一春正月過文江訪鄒南臯給諫廬陵
大行王性海禮予江上請注楞伽二月度庾嶺至
嶺頭觀惠明奪袈裟處詩弔之有翻思昔日宵行

者何似今朝度嶺心因見道路崎嶇行人汗血乃屬一行者立捨茶菴於嶺頭一道者勸修路不數年爲坦途至韶陽入山禮祖飲曹溪水偈曰曹溪滴水自靈源流入滄溟浪拍天多少魚龍從變化源頭一脈尚冷然見祖庭凋弊不堪言遂婁然而去抵五羊囚服見大將軍將軍爲釋縛欵齋食寓海珠寺大參周海門公率門生數十人過訪坐間周公舉通乎晝夜之道而知發問衆中有一稱老道長者荅云人人知覺日間應事時是如此知夜間做夢時亦是此知故曰通乎晝夜之道而知周

公云大衆也都是這等說我心中未必然乃問予曰老禪師請見敎予曰此語出何典公曰易之繫辭公連念幾句予曰此聖人指示人要悟不屬生死的一着周公擊節曰直是老禪師指示親切衆皆罔然再問周公曰死生者晝夜之道也通晝夜則不屬晝夜耳一座歎服先是諸護法者以書通制府大司馬陳公遣郵符津濟三月十日抵雷州着伍寓城西之古寺夏四月一日卽開手注楞伽時歲大饑疫癟橫發經年不雨死傷不可言予如坐尸陀林中以法力加持晏然也時旱井水枯涸

唯善侍者相從每夜半候得水一罐以充一日饑夫視之得一滴如天甘露也城之內外積骸暴露秋七月予與孝廉柯時復勸衆收拾埋掩骱骼以萬計乃作濟度道場天卽大雨平地水三尺自此厲氣解八月鎮府檄還五羊寓演武場時往來作從軍詩二十首初過電白之苦藤嶺盜之門戶也乃作銘建捨茶菴豫章丁大參右武以誣謫廣海至素相慕遂莫逆

二十五年丁酉

予年五十二春正月時會城死傷多骸骨暴露予

今人收拾埋掩亦數千計乃建普濟道場七晝夜丁右武身爲之佐先是粵人不知佛自此翕然知歸夏四月楞伽筆記成因諸士子有歸依者未入佛理故著中庸直指以發之初上下見予爲罪僧甚易之軍門陳大司馬如岡法極嚴無敢私謁者予未往見卽遣人候之甚勤是年九月同右武往謁及門投報止之是晚親往拜予於舟攜茶盒坐談漏三下人皆驚異後對諸當道極稱之曰僧中麟鳳也卽三司亦諭往拜之自是人皆知僧爲重矣

二十六年戊戌

予年五十三春正月侍御樊公友軒以建儲議謫
戍雷州初訪予於五羊時予較楞伽稿公問予雷
陽風景何如予拈經卷示之曰此雷陽風景也公
歎異卽爲疏摹刻海門周公任粵臬時問道往來
因攝南韶屬修曹溪志粵士子向不知佛適周公
闡陽明之學乃集諸子問道於予有龍生璋者聞
予議論心異之歸謂其友王生安舜馮生昌曆曰
聞北來禪師說法甚奇二子俱來請益予開示以
向上事諦信不疑切志叅究二生素有德業相率

歸依日益衆自是始知有佛法僧矣此後法化大
開三生之力也每憶達師許經之願其夏始構禪
堂於壘壁間將擬大慧冠巾說法乃集遠來法侶
并法性寺菩提樹下諸弟子通岸超逸通炯等數
十人誦法華經爲衆講之至現寶塔品恍悟佛意
要指娑婆人人目前卽華藏也然須三變者特爲
劣根漸示一班耳古人以後六品率爲流通亦未
見佛意耳遂著法華擊節右武性急烈負慷慨知
敬僧而不知佛法將歸予送之舟中重下鉗錘公
翻然大悟乃字之曰覺非居士示之以銘又作澄

夢遊卷四

心銘以警之

二十七年己亥

予年五十四春刻楞伽筆記成爲衆講一過乃印百餘部徧致海內法門知識并護法宰官且令知予處患難中未忘佛事耳粵俗固好殺遇中元皆以殺生祭先至時市積牲如積新甚慘也予因作孟蘭盆會講孝衡鈔勸是日齋僧放生用蔬祭從者甚衆自後凡喪祭大事父母壽日或祈禳皆拜懺放生齋素未幾則放生會在在有之爲佛法轉化之一機也是年夏五月制府大司馬陳公移鎮

會城初下車未拜一鄉宦乃先遣候予頃之命取食器一百餘件俱最精者門下皆不知何用及設齋請予特出新器人人皆知其所重如此未幾請告歸是年秋摧使四出地方自此日多事惠州楊少宰復所公往與予有法門深契久以憂歸今秋乃訪之至之日公已卒於塋所詰朝將入山公靈已至城矣予卽往視殮爲求棺槨值潮陽道觀察任公陪直指於惠陽請遊西湖登東坡白鶴峰而歸歸卽欲掩關却埽矣

二十八年庚子

予年五十五時權使初出狠戾暴橫官民不堪地方震蕩加以倭警人心惶惶予卽散諸弟子閉關絕跡粵人素苦閩海之白艚運米恐騰貴也時以爲亂新軍門閩人也公子舟次海上適大將軍請告將行稅使正畜意侵之偶有白艚數隻卽藉口以大將軍爲公子資行者嗾市民大鬪頃刻聚數千人投磚石打公子舟幾破圍帥府持戈相向甚急時三司府縣皆赴軍門行節禮會城無一正官卒無解救者勢變在呼吸也大將軍危之無已乃命中軍詣予關前求解予甚不可曰無神術也中

軍跪泣曰師卽不念兵主豈不念地方生靈乎予聞之惕然遂破關往謁稅使者從容勸化開曉其意使者聞予言果悟乃令自行招安以散亂民予先往大言於衆曰諸君今所爲欲食賤米耳今犯大法當取死卽有賤米誰食之耶衆聞之愕然頃令至帥府圍卽解會城遂以寧父老感予欲尸祝之時三司正在軍門飯聞報民作亂皆投筋而起及回業已安堵然皆知予之力也觀察任公聞之乃以書抵予曰慈師不出其如地方何慈師旣出其如慈師何予亦自知此後無寧日矣是年秋南

韶道祝公延予入曹溪予乘興遂入山爲六祖奴
郎新制府戴公知予安亂民深德之意欲一見諭
大將軍將予往謁及見禮遇甚優畱欵齋飯因辭
往曹溪公遂願爲護法予是得安心焉

二十九年辛丑

予年五十六春正月予見曹溪四方流棍集於山
門開張屠沽穢汚之甚積弊百餘年矣墳墓率占
祖山僧產多侵之且勾合外棍挾騙寺僧無敢正
視者予歎曰此心腹之疾也苟不去則六祖道場
終將化爲狐窟卒莫可救矣予縱居此何爲哉熟
慮之無已乃往白制臺戴公公曰無難也予試爲
公力行之卽下令本縣坐守限三日內盡行驅逐
不畱一人舖居盡拆不存片瓦自此曹溪山門積
垢一旦如洗公因留予齋飯坐談公曰六祖腥羶
予爲公洗之矣目前地方生靈塗炭大菩薩有何
慈悲以救之乎予曰何爲也公曰珠船千艘率皆
海上巨盜今以欽採資之以勢罷採之日不歸橫
行海上刦掠無已法不能禁此其一也地方開礦
採役暴橫掘人之墓破人之產在百姓受其毒
害甚於刦掠由是民無安枕矣爲之奈何予曰此

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

未易言也姑徐圖之採使者李公頗有信心是年秋至曹溪進香於六祖畱山中數日聞法甚喜予因勸爲重興祖庭布金檀越慨然力荷之徐密啓之曰開採爲害於地方甚矣非

聖天子意也採船急設約束期往來過限以罪礦罷開採盡撤其差役第令所司歲額助解進秋毫無擾於民可乎採使唯唯力行之由是山海地方一旦遂以寧公深感之以書謝予曰而今乃知佛祖慈悲之廣大也以此護法之心益切予因是得以安心曹溪是年秋開闢祖庭改風水道路選僧受

戒立義學作養沙彌設庫司清規查租課贖僧產歸侵占一歲之間百廢具舉

三十年壬寅

予年五十七是年重修祖殿培後龍改路徑以屠肆爲十方旦過寮闢神道移僧居拓禪堂創立規制

三十一年癸卯

予年五十八冬十一月達觀禪師在京師遭妖書之厄逮下獄訊以爲予之故因此又及之予心知不克安心以待荷

聖恩寬之京院有通行是年侍者深光出家

三十二年甲辰

予年五十九春正月以達師之故通行至按院檄予還戍所遂去曹溪往雷州因憶達師云楞嚴說七趣因果世書無對解者予曰春秋乃明明因果之書也遂著春秋左氏心法

三十三年乙巳

予年六十春三月渡瓊海訪東坡枕榔菴白龍泉求覺範禪師遺跡不可得寓明昌塔院作春秋左氏心法序遊名山作瓊海探奇記金粟泉記夜望郡城索然若無人煙唯城西郭少有生氣予因謂諸士子曰瓊城將有災急禳之人以爲妄及予渡海方半月地大震城東壁連門陷城中官舍盡傾塌明昌塔倒壓予所居樓盡碎予行時士大夫苦畱之予不肯止若不行則亦爲灰粉矣月夜渡海觀瓊之勝概予以爲仙都乃十洲之一云夏四月制府檄予回五羊秋七月至曹溪去時祖殿已拆修造工未止歸則完者十之六七所負工料將千金毫無出予化兩內使者施盡償之是年修五羊長春菴爲曹溪禪院爲六祖辦供之所冬十月侍

夢遊卷四

十一

者廣益廣攝出家

三十四年丙午

予年六十一春三月度嶺至南州候丁右武謝張
相國洪陽公以予在難時公居亞相知予之難始
未最詳相與一時力救之予心感焉故往謝公欣
然道故請予齋於江上之閒雲樓邀諸鄉友陪坐
公曰人皆知慤公爲僧中一大善知識不知大有
社稷陰功也衆聞之悚然問公公言其概一座動
色回過文江訪鄒給諫畱數日至章貢陳二師將
軍畱署中病暮月有臥病詩十二首歸曹溪秋八

月

皇長孫生有恩赦凡在戍老疾及詐誤者俱聽辯
明釋放予在例乃往告軍門准行勘復之雷州道
勘明應赦按察司類造候題遂開

三十五年丁未

予年六十二春三月予告回籍軍門檄韶州安置
曹溪予住山中時得爲諸弟子說法是年注道德
經成予幼讀老子以文古意幽切究其旨有所得
俗弟子請爲之注始於壬辰屬意每參究透徹方
落筆苟一字有疑而不通者決不輕放因此用功

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

夢遊卷四

三

十五年攜於行間至今方完

三十六年戊申

予年六十三議修曹溪大殿春二月馮元成公任嶺西道因訪予入山宿夜夢大士現身有感詰朝殿禮佛至大士前見兩棟摧朽驚謂予曰何不修此予曰工大費多力不及耳問費幾何予應以若干公曰無難也吾試爲之歸白制府戴公公曰殆哉見孺子將入井必匍匐往救之况佛菩薩處此危地不動心非天也乃詰所費卽以予言告公曰猶未也卽屬南部道往勘估計且令請予面議予

往見之公慨然欲獨爲鼎建三告曰若勞公家之費恐不便苟依法門故事請以募衆爲之公屬嶺西道爲疏十二簿三司道府各置一扇隨意施捨總會於府解歸於一無庸歸僧如此則不勞而易集公從之不期月而集將千金予躬往西粵采木至端州制府畱修寶月臺乃別委官采辦冬寶月臺成予作記材木俱積於端江之滸次第運之冬十一月初安南賊破欽州戴公請王師遠討因覈論罷

三十七年己酉

予年六十四春二月予自端江運木回阻風於羚羊峽遊端溪有夢遊端溪記木運至濛江予回寺方集衆經營衆中一二不肖者遂作孽抵牾因鼓衆爲亂如叛民予見而歎曰此予重違佛教乃着相之過也衆方鼓噪予獨坐堂上焚香誦金剛般若以前但誦文實不解義至是恍然有悟乃注金剛決疑稿成衆寂然不肖者不信予心益危懼遂訟於按院准行司理予是時卽飄然出山聽理船居於芙蓉江上者二年資斧已竭別駕項公楚東抱關於浛洸邀予往江行遭風破舟及至復大病

幾死公延醫力救之及回郡乃臥病於旅邸將期年

三十八年庚戌

予年六十五是年臥病旅邸秋七月直指按部至郡訊及予司理聞之方爲理反坐予罪直指大不然駁之云某有大功於六祖向所捨爲常住計者今姦僧得利而反罪之是謂平等法門乎復行本道嚴究之由是本府親詣山中按僧之所開狀逐款審之盡妄言無當所誣侵常住八千餘金予初立常住庫司清規置有號票凡一應錢穀收支有

監寺書記秋毫出入皆執號票爲據不妄發也至是當官研覈查算以號票爲準無分毫及予者時上下內外方信予之不妄也事乃白當道重怒其僧再三請予留住山中予心已厭倦力辭之寓五羊之長春菴

三十九年辛亥

予年六十六春三月居端州鼎湖山養疴初奉赦候題向無按院覆命故延至今復奉重勘明始注銷聽自便時諸士子相依請益述大學決疑四十年壬子

予年六十七居長春菴爲弟子講起信論八識規矩乃述百法直解以法華擊節文義聯絡不分學者難會乃着品節

四十一年癸丑

予年六十八居長春菴夏爲諸弟子講圓覺經方半卽發背疽醫不能治幾危大將軍漢冲王公業爲予治後事粵人梁杏山者酒人也素以醫瘍名偶至視之曰甚矣少遲則莫救矣幸安心無傷也乃純采草藥以敷之隨手奏效猶如弄丸刻期取效至冬乃痊予爲文以謝之此疽蓋自初坐禪時

所發知是冤債以誦華嚴經告假者每向於書寫
讀誦華嚴則竊發隨禱而止卽至粵中已兩舉不
成患在身四十八年矣初起時偶忘之且不知爲
疽遂成大疾其冤業酬償蓋以身試之不爽也十
月疾愈初與衡陽會儀部金簡有南岳休老之盟
書以十數未能也今以書來請遂杖策而往乃去
粵初予至粵時法性弟子相從者數十久之漸零
落唯通炯超逸風波患難疾病相從未離左右今
將行皆不捨願從之炯尚有羈少遲之擔簳以從
是年十一月至湖東先是弟子福善攜侍者深光

北歸探親至是不數日亦追至

四十二年甲寅

予年六十九春正月遊德山禮祖有詩四首訪馮
元成公於武陵會龍參知朱陵受榮王齋大善寺
衆僧請受戒馮公與諸同道各捐資修曇花精舍

夏四月還湖東聞

聖母賓天隨建報恩道場有恩詔乃對靈龕披荆
謝恩還僧服因痛哭曰悲哉檀越往矣本寺之願
已矣豈待再來耶楞嚴經自東海立意著通議久
蘊於懷未暇述今夏五月方落筆五十日稿遂成

十一月精舍成有山居詩度侍者慈力

四十三年乙卯

予年七十春爲衆講楞嚴通議夏四月著法華通義以雖有二節全文尚未融貫故重述之五十日稿成纂起信略疏秋八月遊南岳中秋日登祝融秋九日馮公自武陵移守湖南陪遊方廣寺回巡道吳公生白過訪湖東談及楞嚴吳公大喜卽與諸屬捐資刻之禮八十八祖道影吳公大讚歎乃命畫士臨小像冊請予各爲傳贊馮公赴任未幾卽請予遊九疑冬十月至零陵留過冬於愚溪

四十四年丙辰

予年七十一春正月歸自零陵方遺民從宦遊歸依於湖東命名福心更初達觀禪師入滅之次年予弟子大義請靈龕回南緝白弟子奉供於徑山之寂照菴今一紀矣予難忘法門之義向欲親往一弔故香亦未遣也適聞葬必欲一往將行花藥寺衆僧請齋爲續法系遊梅雪堂弔遜菴宗師夏四月離湖東有去南岳解嘲詩鄆慕一方遺民何仲益諸子送至樟木市五月至武昌會段給諫幻然禮大佛遊九峰六月至潯陽遊東林有懷古詩

登匡廬弔徹空禪師避暑於金竹坪註肇論因見其山幽勝有歸隱之意徧覽無可居者七月遊歸宗登金輪峰禮舍利塔有詩有僧以五乳相送爲靜室予登覽觀其地不廣而其境頗幽遂受之江州邢來慈居士達師之弟子也願爲布金檀越故予有投老之意焉浮梁陳大參赤石公至山相訪聞予有意匡山亦願爲護法秋八月出山至黃梅禮四五祖訪汪司馬公入紫雲山畱旬日汪公願作匡山建造檀越別去相城訪吳太史觀我吳中丞本如欲建如意菴以畱遊浮山截江登九華十月初抵金沙于王合族與東禪浪崖耀公迎之居頃卽之雙徑石門顏生之居士候迎於吳江乃過其家士備齋資以隨行長至月望至寂照十九日爲達大師作茶毘佛事先爲文以祭之預定是日無爽識者異之二十五日手拾靈骨藏於文殊臺弟子法鑑隨建塔予爲塔上之銘以盡生平法門之義焉遂畱度歲時爲禪堂衲子小參有參禪切要鎧公請益相宗爲述性相通說諸請益者各說有法語作擔板謫粵弟子通岸先別獨超逸同諸子福善法孫深光廣益廣攝慈伴行

四十五年丁巳

予年七十二歲春正月下雙徑弔雲栖時縉白弟子千餘人久候於山中畱二旬每夜小叅聞法各歡喜發揮蓮池大師生平密行弟子聞之至有涕泣謂予發人所不知者乃請作塔銘回時玄津法師壑公同通郡宰官居士金中丞虞吏部翁大參諸公請畱淨慈之宗鏡堂日繞數千指爲說大戒作宗鏡堂記諸山各路名德法師俱集於湖上問法各申詰難時謂東南法會之最勝昔所未見也乃遊靈隱三竺西山諸名勝贊揚放生三池乃

行城中宰官居士具舟放生餞別於湖上且具狀請畱雲栖乃有三年之約遂行凡一過所經諸作玄津壑公譚生孟珣彙爲東遊集四卷刻之回至吳門巢松一雨一法師請入花山遊天池玄墓鐵山諸勝寒山趙凡夫嚴天池徐仲容姚孟長文文起徐清之諸居士設供於山中馮元成申玄渚二宰官齋於家將行弟子洞聞漢月久候錢太史受之親迎至常熟遂至虞山信宿太史送至曲河賀知忍父子姪候於奔牛之三里菴請畱園中結夏力辭之送至京口受三山縉白齋罷卽返匡山五

月一日過白下江上一宿見一二故人卽揚帆而西五日至蕪湖劉繕部玉受欵畱作異夢記說崔吏部鶴樓追晤江上五月十六日舟次星渚抵歸宗寓居未幾時汪司馬公業先具資爲予修靜室六月十五日弟子福善經營五乳開土於十月終始成一室乃得安居爲衆講楞嚴起弟子超逸閉死關於金輪峰

四十六年戊午

予年七十三是年修佛殿禪堂三月浮梁陳赤石公入山結中素鮑公我齋夏公爲十友助修造資

冬十二月殿堂成

四十七年己未

予年七十四春正月與弟子通炯至遂開堂啓諷華嚴長期爲衆講法華楞嚴金剛起信唯識諸經論命炯首衆秋七月以五乳爲十方養老常住八月望予閉關謝事效遠公六時刻香代漏專心淨業每念華嚴一宗將失傳清涼疏鈔皆懼其繁廣心智不及故世多置之但宗合論因思清涼乃此方撰述之祖苟棄之則失其宗矣志欲但明疏文提挈大旨使觀者易了題曰綱要於關中批閱筆

創始冬於關中爲衆講楞伽起信

四十八年庚申卽泰昌元年

予年七十五春課餘侍者廣益請重述起信圓覺直解莊子內七篇注夏病足痛前任分巡衡陽吳公轉粵泉入曹溪禮祖託山中弟子寄乞諸祖傳贊予病中爲纂傳七十一首各系以贊親爲書之初予去曹溪之南岳住匡山業已八年而曹溪衆僧深思予歸堂主本昂等往來問訊十數欲請之而未能也吳公赴任便道入山見予重興之功嗟歎久之衆僧因具白所以思予歸請不能之狀吳

公欣然爲作護法卽具書往請合山大衆及本省鄉縉紳居士同具狀昂同二三耆舊至匡山哀乞予時以病謝

天啓元年辛酉

予年七十六春弟子侍御王安舜入山問訊夏爲衆請講楞伽時前任本道祝公亦轉粵海道同吳公具書再至予又以病謝是年冬又爲衆講楞伽肇論起信

天啓二年壬戌

予年七十七春正月粵弟子孝廉劉起相陳廸祥

陳廸純梁四相入山問訊起相與四相伴山中
住半載爲講楞嚴起信金剛二月東吳弟子方遠
隨至同作休老計秋七月王侍御復入山親請歸
曹溪不諾時力提華嚴名綱要草就吳公朝覲回
又遣書意更切韶陽太守張公特書專堂主昂至
予情不獲已意必一往於是年冬至月十日出匡
山過螺江會太史蕭拙修劉韶也劉轉華馬季房
曾堯臣賀可上鄒端侯諸居士過虔城江上會寧
都蘇孝魏期諸君齋於江上有詩贈別度嶺
過集龍菴會劉敬一諸故人十二月望入曹溪合

山僧衆羅列香花如獲母

天啓三年癸亥

師年七十八居曹溪禪堂春正月郡守張公入山
問訊三月省城法性諸弟子至師時專以法施爲
心四月爲衆說戒講楞嚴起信等經論秋七月又
爲衆說戒十月初四蕭宗伯玄圃公應詔北上入
山見師欣然畱連且爲師卜壽穴劇談一日夜甚
歡出山師卽示疾初六日侍者廣益省城回云來
得恰好韶陽太守張公親入山延醫調治初八門
人超遙至云再兩日不得見汝了師知幻緣將盡

藥劑不服十一日已特別張公申時飲水沐浴焚
香示衆曰大眾當念生死事大無常迅速一心端
坐而逝於時百鳥悲鳴四衆哀號不已星夜毫光
燭天隔山之人咸疑寺中火也三日面色如生髮
長唇紅鼻端微汗手足如綿蕭公聞訃悲慟久之
卽移書南韶二郡公爲師建塔及造影堂先是師
離匡山畱首座通炯於五乳調理大衆至是三遣
書促歸中有云汝早來一日便是一日來老人餘
日無多力矣炯得書遂忙忙南還十月朔日抵曹
溪師見之喜動顏色且云來得好遲時恐汝懊悔

了炯初不會其意連日侍立所聞所叮寧者皆佛
法大意惓惓以法門無人爲歎提撕者又極緊切
語去期已先露於炯未歸之前矣

大師年譜自序實錄向有手筆草藁爲大師首
座寄菴通炯所藏炯師歿後法孫今照今光住
海幢寺華首和尚從二僧取得此藁繕寫封寄
今遵依元藁付梓天啓三年癸亥實錄乃大師
入滅後上首弟子福善等續記附刻於後以大
師爲中興龍象一言一行關係人天眼目文取
足徵事貴傳信不敢拔綠葛藤添附蛇足以滋

法門增益之謗後有正眼幸鑒別焉戊戌孟夏
佛成道日海印弟子錢謙益槃談謹書

憨山大師託生辨

湖南顥愚衡公作曹谿中興憨天師傳盛談靈異宿
生爲陳亞仙歿後應現爲蕭公子諸方頗疑其誕天
童木陳恣公見聞雜記云大師託生桐鄉爲顏司理
俊彥少兒三歲不語一日呼其父名曰汝我前身弟
子也司理登第授官廣州皆先知之病症不起召魏
學使浣初至榻前執手道故囑撰銘證明未後事余
讀而心訝之學使余里人也大師東遊未嘗樞衣禮
足安得有執手道故之事司理屏居石門馳書達詢
其詳遂召崇禎二年七月南華僧智融本昂仲報文
牒及壇記石本寄余僧牒曰二公子示現童真于菩
薩家能令眷屬割世間恩愛作茶毗佛事火浴後項
齒不壞舍利無數大者如彈丸小者如菽色如曰瑪
瑙扣之鏗然有聲海衆共觀歎異召是月二日酉時
安厝靈骨建塔于先大師壇院之左至人出生入死
遊戲自枉豈先大師遺蜕返匡山現此金鑠還鎮祖
庭抑亦山中耆卒宿乘願力來住此道場耶壇記則
曰顏氏子名祉小字虎子生于天啓六年丙寅二月

寶大師示宋後三年生四歲而殤司理之官曰虎子
 私語家人吾乘便得往曹谿矣已此言證知大師再
 來若恣公所載呼名叙昔云云則未之前聞也司理
 父子家業歸心信根牢固生生居士常夢護伽藍神
 趣迎賓頭盧越翼日大師至止慈容法筵宛如昔夢
 司理爲書生大師摩頂記前比爲廣理申明大師規
 約復其侵田虎子以信心入胎自求父母良非偶狀
 也童真示現各有所表吳粵達來表法界一地故痘
 疹發香表染淨一如故靈骨不損表靈相具足故四
 歲夭折表已入鳩摩羅地故歸骨塔院表依止大人

故此則積劫熏修彈指幻化不可㠭思惟測度也若
 已是因緣證成爲大師再來則竊謂不狀何也古來
 佛祖應化入胎人天轉輪事非睭爾裁察再世蓮浣
 衣㠭寄生宣老六季仗白雲而勘辨莫不付囑相應
 機感歷狀而今無是也吸引緣熟啐啄時同雙峰之
 香煙猶指五乳之真身有歸吾謂是子也多生此世
 必入大師室著大師衣受大師戒遣來作使告報異
 生卽事徵理無可疑者嗚呼我大師人天之師末法
 中第一龍象也末後轉輪法門一大事因緣也僧徒
 無識縈心香火指法城爲首丘認寶坊爲華表章句

小儒眼如針孔景掠李源圓澤身前身後剩語縉白
 郵傳寐言夢斷海形牛迹不已遼乎俗語不實流爲
 丹青吾懼後之修僧史換佛錄者採獵異聞而訛濫
 正信也旣屬恣公門人告于其師請爲刊正而又書
 其說詒南華僧鏡諸塔院昭示後人俾勿惑歲壬庚
 子四月望日海印弟子虞山錢謙益槃談謹述

憨山老人夢遊集卷四十

終

憨山老人夢遊集卷四十

下之

虞山私淑弟子毛晉編較

附錄

大明廬山五乳峰法雲禪寺前中興曹溪嗣法

憨山大師塔銘

有序

余小子廣淪賓之在中秘也偕同叅數子請益牢山
 憨公于龍華精舍蕭宗伯玄圃暨吾家司馬體中與
 焉所聞非帝網之十玄則祖燈之五葉而師特以體
 究念佛爲露地兩輪後十年入粵而皖江之素復我
 又後二十年入吳因體中而浮渡之鼓振我於是余

始能游師之藩悉秘現湧沒順逆種種影事又七年
 玄圃徑曹溪而北及送師于懸崖明年而余得請幕
 府何公克以師輓還五乳也又明年上首福善瑩石
 爲楮而奉師自著年譜使余吐舌爲筆余受卒業者
 三而龍華浮渡之會儼然未散矣師法諱德清慕清
 涼法界之玄故字澄印別號慈山乃選於五臺之奇
 以喻狂性之歇者也系出金陵蔡氏考諱彥高妣洪
 氏夢觀音抱送而孕誕于嘉靖丙午孟冬之旬有二
 日白衣重包十年辭家依報恩寺主西林和尚使法
 孫俊公爲之師十九禮棲霞雲谷大師薙髮受具二
 十六北游出入燕晉得自在三昧于臺山三十八遯
 跡東海之那羅延窟久之得六種就踰五十放于嶺
 南而以出家優婆塞大振曹溪之鐸 親恩游逮袈
 袂著身而師年六十有九矣又三年反自吳營菟裘
 于廬山五乳峰下刹曰法雲以養十方之老居數歲
 復如曹溪當年之七十有八臘之六十是爲天啟癸
 亥先于懸弧者一日而示寂焉師丰儀慈滿神情凝
 定望之似阿羅漢初就外塾而母督之嚴徐而察焉
 知非池中物也從臾若翁以梨愛網而師之酬罔極
 也卻十鑑之供于山陰藩邸獨拜 孝定皇后之賜

泥金和血以塗雜華攝二老子香幢光蓋其省觀也
閒于報恩藏輪三宿子舍有法喜而無情恒君子曰
生之成之是謂聖善熏之變之是謂潔白世間慈孝
其海之一漚而已矣北講之涉天漸也自無極之說
華嚴玄談昉也南禪之反故鼎也自雲谷之付念佛
公案昉也兩大士口光交灌師頂不驚不溢身恒晏
坐華藏道場而清泰法王若二法王子入于淨念猛
心如形斯鑑其養之專也乃至行于都市不見一人
知其解者以爲密雲尚往他日更于肇公似昔人非
昔人義得未曾有所謂旋風常靜江河不流證之目

前一一諦了而七歲時生來死去之疑渙然水釋其
偈曰生死晝夜水流花謝今日乃知鼻孔向下得宗
通之相一卓錫臺山略杓岸頭聞機數反久乃不聞
吹萬之誼雪窟頭陀酬對以目菜羹米汁旬啖一升
念息塵忘立而喪我者不知幾旦暮也其偈曰瞥然
一念狂心歇内外根塵俱洞徹翻身觸破太虛空萬
象森羅從起滅得宗通之相二牢山之會心也海天
雪月互影交光三昧現前無入無出其偈曰海湛空
澄雪月光此中凡聖絕行藏金剛眼突空華落大地
都歸寂滅場得宗通之相三又後三年靜中機發不

因心念意在舌端其偈曰煙波日日浸寒空魚鳥同游一鏡中夜半忽沉天外月孤明應自混驪龍所謂月落後相見是耶非耶得宗通之相四益自是廻真入俗而有省觀之游妙喜大悟拾八小悟無數箇中冷煖惟師自知意者菩薩根力次第增上明妙安樂恒與王所相應故華嚴之在筆端也六字佛名心手相得卽一點無空過者而客主周旋語不愆忘文無亥豕妙法蓮華回向慈聖亦若是則已矣臺山無遮之會日更供具席以半千坐滿萬人皆師陰爲擘畫如時而給刹啄無聲所與首事妙峰登公了不知

其來處當事之嚴不交睫者九旬以水代飧者七日其去以匝月息者也借曰壯齡則耄期而徑余邑屋矣雲興瓶漏脅罕至席不晤其倦于勤也嘗間行海南訪子瞻寂音故蹟而望郡城生氣獨據西隅趣行北渡而瓊州地震存毀具如師言永嘉詮定初曰引起後曰辦事師其二之中平臺山之悟四顧無所容決而以現量寓目首楞嚴王八閱月無用心處其在那羅延窟則楞嚴懸鏡半燭而成亦無用心處門人曰盍使一一文句消歸觀心師領之楞嚴之有通議自此昉也嘗以四法界觀說法華于嶺南至現寶塔

品喟然嘆曰佛意要指娑婆人人目前卽華藏然須三變淨土者曲爲鈍根漸示一班耳從是法華之有擊節有品節有通議自此昉也折蘆孤唱楞伽握符裁松代興金剛司契而師照以楞嚴之鏡則無門之門無住之住皆若有啟其鑄者以故楞伽筆記和人目爲流徵之音而金剛決疑則雖空生再來固當相視而笑華嚴一宗往往迷清涼之廣而耽方山之略不知廣之可以略也五乳一關三周寒暑疏之綱要其將與合論並珍如是種種說通之相布在方策覩煙悟火宗通歷然誰謂與不傳者俱往而法雲之漏

刻之以香課佛名日至數萬圓頓交叅禪土雙妙兩大士最初結束撩起便行直向山眉海目繞錫三周作一宿覺豈不真勇邁終古大夫哉韋編珠笈初以爲前茅中以爲副乘卒以爲輔車於是作中庸直指大學決疑著春秋左氏心法道德南華內篇爲智度善巧而鬼神情狀表章丘明曰夫夫冥叅魯竺之心法也東粵周叅知舉大易通乎晝夜之道而知以質師曰是吾宗所謂不屬生死一著子也叅知躍然更爲諸弟子暢其玄義而師以西伯爲東諸侯主矣蓋西林翁嘗鈍置師以世諦使侍臯比故於二酉多

所漁獵法書韻語少作功力美秀夙成事辭之文居然良史而非蒲字莊嚴一乘鼓吹無述也王大司徒弇州屬以慧業建穀得其所謂夷然不屑厥仲奉嘗贈以晤言曰可知王逸少名理讓支公而汪左司馬南溟則悲五宗衰相聲輓力推岌岌平爲徑山中峰之室危得之矣伏牛法光和尚師目之宗門香象自慶小穴小友畜師勉以離心意識叅出聖凡路學而師時已得肇公意旨北臺影師言庶幾獨怪其吟哦不停以爲魔著間而請焉報言驟發悟機而有物據我舌本爾時恨不遭鉗錘毒手痛棒熟眠以至此

耳師心識焉館于胡臬憲順菴之署強可覓句遂不得休念光師之魔且至寢不成寐跏趺坐忘起問居諸而數盈于把矣故終其身於無礙辯才而得自在師之升聞于慈聖也爲聖躬禱也其作無遮道場也爲皇儲禱也居一年貞皇應河清之瑞而誕唱導之侶妙峰大方咸被寵錫而獨師逃之海濱求華嚴菩薩住處所謂那羅延窟而谷隱焉慈聖多之建寶坊于西山以召而弗之敢往也賜金百五十鑑以繕阿蘭而弗之敢拜也無已請如漢汲黯矯制事果山以東緇黃鰥寡囚繫之腹而有司者策

書以報 慈聖愈益多之藏函 寶璽有隕自天以
草昧故虔于他已又 勅宮媛之勝任者布金有差
而觀音菴之廢墟 賦額尚方稱海印禪寺矣於是
有挾隆隆而耽視茲土者號無賴黃冠百餘輩稱引
宋七真故宇以爲訟端萊守有聞於李中丞將致辟
而首難者露刃逼師談笑道之立解偕行數百武其
黨疑與師購將倒戈師更與入市啖以瓜果一郡盡
讙謂方士殺僧矣師乃明其不然卽渠魁無使滅耳
第盡驅越境而已其以德報怨類此而往者報恩殿
廊之燼也師與雪浪恩公矢以一期戮力及奉 勅

藏還寺而舍利窣堵出光明橋以迎貝蒭師因入謝
請 慈聖曰減膳饑需隆棟久之事有端矣戒于島
夷遂不果而中貴人之與轉藏輪者嘗以毗睚得過
上左右衆鑠之謂其監緣飾佛事多罄帑金而詐
稱黃冠摭已事鳴登聞以訟有旨逮師及中貴人
對簿 詔獄師內空其心而外侃侃言事請覈內府
則賑饑之籍固在而他無所得其漏卮釋憾于中貴
人者本不欲患師更以所稔顛末其廣貞狀 上意
浸解坐私建梵刹戍之雷陽而諸刹之蒙悉擅于
慈聖者雖往來厲而億無喪矣故相張洪陽先生稱

其難棄能棄難忍能忍以能幽贊 神廟之孝爲
 社稷功亮夫師於般若香光固是雲谷老人安上鼻
 孔臨岐偏授亦自不無妙峰恩公一臂臺山遂作暮
 雲春樹清風匝地何之非早歲墳壠而師所描邈于
 飛雪之鑪運風之斤狎主之歟亦不啻三鎧甲龍從
 涅槃起矣紫柏大師於世罕所許可而獨輕千里之
 駕于堅牢晉琬公塔院之會送難通理一坐四旬于
 宇內法喜無兩其示寂圓扉雖廻曵葷毒于含沙而
 本所懷來固未嘗不在雷陽棨戟之下也雙徑之遊
 虽微上首鎧公固當已事遙往愆期有待而適會紫

柏以舍利遷爰及閣維銘諸堅白其斯以爲方外素
 交揚厲雲棲證知吾師蓮祖爲法華地湧中人而浮
 山朗目智公亦以旋陀羅尼與作點睛手則予小子
 實竊負法壘登弧漸騰而附青雲上矣師謂紫柏瀾
 之濁矣維泉之昧及吾兩人之未髦也左提右挈以
 爲曹溪滌除宗門其有興乎左股旣夷壯馬是急故
 紫柏自曹溪如燕而師度嶺已還乃心固不在祖窟
 窪之以周泉憲海門而曹溪志成鎮之以戴制臺而
 厝沽之肆一灑徂僉虎冠兵奴我苾芻蠶食我疆里
 者令不崇朝烏散鬼匿招提改觀於是平範之以律

儀經之以出入守之以典籍潤之以法流育之以義學如是者數年寶坊輪兵浸假若新最後有事于大雄寶殿而一二黠悍師蠹惡其害已歛張群謀將以一矢加遺而師方晏坐誦金剛般若深解義趣愉愉如也謀者心怍已退而不釋然乃因制府之罷誣師掠用常住物憩御史臺流寓二年司理錫之輦帶直指弗是也下郡徵典守節符會之秋毫無爽乃褫訟者服以竄而曹溪之蠱裕矣師之少也受遺西林翁獨以心計償兩世逋負緝至千於無遮之會而峻籍其羨以畀塔院寺主大方貲至萬知以恬養勞以謙

牧發機干所不得已而藏用于所不可知驥稱其德而力倍凡馬無筭矣雖報恩之籌以師命輒海印之績以城社隳南華之墉以裨販圮而師惟心之土悲智妙嚴豈復有乏少耶貴璫之濫于權也藪益叢姦不可嚮邇差幸有浮慕于福田而師受戴制臺請與爲嬰兒其應如響於是稅使者窘于至期迫不得所欲而黃白之治受成有司民不知有履尾之呴白艚遺粟食民而騰粵糴邦人患之而戴公胤子將歸溫陵其行也與白艚會于時權使有憾于將軍則多族市井豪讐以媚寵胄士之告急于師者再矣師方安

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

居扉爲之啟從容諭衆而欲得賤耀耶今罪在大辟
耀雖賤誰當食者衆怒少怠而急白權使者出令寧
反側心且明非胤子之過匡圉閑然益師輕身以先
持戟使師泣大鑒宗盟而師脫載鬼之弧納用缶之
牖無烈俠氣有烈俠功所謂動刀甚微譖然已解進
乎技矣師昆尼純白廉而不剗門庭在雲棲紫柏之
間德充之符近之而愴憺折疑城頽曠劍墮出要谷
諷不惜四楞著地惻乎惟恐人之不有之也踪跡半
天下所至登鵝摩之壇升白椎之座以數十會計東
齊南越法化久湮佛種幾斷而自其得師也若醯雞

之覩天地熏于二嚴誓于九品乃至盂蘭放生諸白
淨行無冠笄童耄翁如也別傳之宗時復爲利根者
賈勇而齒牙無畏投芥于鍼使清涼之區得遵累
朝憲章弛于任土而大木終其天年爲官家佛法僧
物寺主取大邑人無災用脫桎梏居然五天之郭一
郊廓矣今上毓于青宮詔戍士之老疾詎誤者
陳情而宥師有二焉首尾覈奏凡六年乃聽自恣而
慈聖之爲孝定也臨于湘東大作佛事然後免
妙喜之冠反棲賢之圉而師初行脚時所銘一鉢一
衲雖豐城之與延津弗若矣師所莫逆海內賢豪無

慮百數而天隨風負則北之湖南之戴爲尤湖東練
若以曾儀部金簡爲三年淹五乳十檀則汪少司馬
靜峰執其牛耳是時名刹之虛左者桐鄉之浮渡以
堂金沙之東禪以構其曰塵尾是瞻武陵雲棲則萃
通國之懽以請禪講勝流剗心晤就美盡東南而竟
爲廬阜之岑寂所局已復爲曹溪之謳吟所吸人以
爲疲于津梁而師固未嘗下臺山之座也總其樂說
無礙之辨曲示單傳而鎔入一塵法界似圭峰解脫
于文字般若而多得世間障難似覺範森羅萬行以
宗一心而嚴無生往生之土又似永明雖正令寂寥

稍似婆心太熟亦或觀時返根不忍法堂前草深一
丈耳先甲曰辛以革其面後甲曰丙以蔚其文二十
年以來飲光之華往往於吳楚間振其夕秀淪曹源
者豈曰無庸師可報紫柏于淨土矣書華嚴時夢與
登公謁清涼國師于千金刪之窟而慈氏法王亦乘
率陀樓閣影現夢心錫以策文曰分別是識不分別
是智依識染依智淨染有生死淨無諸佛佩斯印也
以游世間所謂善能分別一切法於第一義而不動
益師之所從來深遠矣年譜之筆絕于癸亥而專以
法施爲心六字其末後句也前化及之三旬徧謝申

警若將遠行且各留楮墨爲別衆以師眷眷法雲也
 判袂玄圃而小不豫矣侍者以遺教請至心念佛而
 外無他囑也初度欲臨而張韶州奉紫叵羅衣爲壽
 清言浹日歡若生平日中而驪駒叱馭日晡而白牛
 說駕矣二時暖于頂三日汗濡于鼻覩貌如生而遙
 罣其瑞相者謂招提且大最後供通曰內外諸法空
 洞一如何去來之足問然則叅雲谷時所覩三聖對
 現色身漚滅空澄了無所得永明有言生則決定生
 去則實不去刹那際中去齊而送者徙市去越而慕
 者傾都去震旦而哀者撼丘陵榮者雕金石如夢乍

醒不消一咄矣緣熏習影重重無盡而出纏弟子曰
 福善某某等在纏弟子曰卽墨黃生納善某某等五
 羊馮生昌歷某某等服勤請事助轉法輪皆其盛者
 也于師臺山願文四攝衆中固是恒河沙一數而黃
 生剝臂爲燈以薪反錫痂癱作大悲形衣髮皆具首
 樞嚴觀晝夜一蒲勤勇坐脫可謂奇中倍人下逮余
 小子賓啖法乳于名字之初灑心血于窣堵之後雖
 步趨未也共相與力倘亦有不可思議者焉師瑰意
 奇行著千年譜不可殫書所著復有心經直說圓覺
 經解起信疏略起信直解百法規矩直解性相通說

肇論註八十八祖傳贊方便語叅禪切要觀老莊影響論憨山緒言夢游集若干卷並行于世銘曰覩師舌相渝三紀而不能挈其廣長摸師眉毛亘三旬而不能知其在亡聽之以心兮失曠呻之師子游之以目兮得迴旋之象王其語無聲其默孔揚其形不疲其神不傷璞三刑而爲璽金百煉而彌剛禮師塔也皮相者以爲化城之幻迹而心服者以爲寶所之慈航賜進士出身左春坊左諭德兼翰林院侍讀菩薩戒弟子旛舒廣淪吳應賓頓首拜譔

大明海印憨山大師廬山五乳峰塔銘

我神宗顯皇帝握金輪以御世推慈聖皇太后之志崇奉三寶以隆顧養上春秋鳴盛前星未耀慈聖以爲憂建祈儲道場於五臺山妙峰登公與憨山大師實主其事光宗貞皇帝遂應期而生於是二公名聞九重如優曇鉢華應現天際妙峰不出王舍城大作佛事而大師有雷陽之行其機緣所至橫見側出固非凡情之可得而測也大師之遷化於曹溪也大宗伯宣化蕭公親見其異爲余道之已而南海陳迪祥以行狀來謁余表塔余曰有吾師宣化公在他日請爲第二碑又明年乙丑其弟子居廬山

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66 67 68 69 70 71 72 73 74 75 76 77 78 79 80 81 82 83 84 85 86 87 88 89 90 91 92 93 94 95 96 97 98 99 100

者曰福善奉全身歸五乳而留爪髮於曹溪走書來告曰大師東遊得子而惠曰利竿不憂倒却矣燈炮月落晤言亹亹所以付囑者甚至塔前之銘非子誰宜爲余何敢復辭謹按師諱德清族蔡氏全叔人也父彥高母洪氏夢大士抱送而生七歲叔父死屍於牀問母從何處去卽抱死去來之疑九歲能誦普門品年十二辭親入報恩寺依西林和尚內江趙文蕭公摩其頂曰兒他日人天師也十九祝髮受具戒於無極某公聽講華嚴玄談至十玄門海印森羅常住處悟法界圓融無盡之旨慕清涼之爲人字曰澄

印從雲谷會公縛禪於天界寺發憤參究疽發於背禱護伽藍神願誦華嚴十部乞假三月以畢禪期禱已熟寐晨起而病良已三月之內恍在夢中出行市中儼如禪坐不見市有一人也雪浪恩公長於師一歲相依如無著天親嘉靖丙寅寺燬於火誓相與畜德俟時以期興復師旣歸然出世而雪浪卒爲大論師修治故塔稍酬誓願焉師嘗聽講於天界廁溷清除了無人跡意主東淨者非常人也訪之一黃面病僧目光激射遂與定叅訪之約質明則已行矣卽妙峰登公也師以江南習氣軟暖宜入冬冰夏雪苦寒

不可耐之地以痛自摩厲遂飄然北邁天大雪乞食廣陵市中曰吾一鉢足以輕萬鍾矣抵京師妙峰衣褐來訪須髮鬚髮如河朔估客師望其眸子識之相視一笑叅徧融貞公融無語惟張目直視又叅笑巖巖問何方來曰南方來巖曰記得來時路否曰一過便休巖曰子却來處分明遊盤山至千像峰石室見不語僧遂相與樵汲度夏時萬曆元年癸酉也明年偕妙峰結冬蒲坂閱物不遷論至梵志出家頓了旋嵐偃獄之旨作偈曰死生晝夜水流花謝今日方知鼻孔向下峰一見遽問師何所得師曰夜來見河中

兩鐵牛相鬪入水去至今絕消息峰曰且喜有住山本錢矣遇牛山法光禪師坐叅請益法光發音如天鼓師深契之送師遊五臺詩云雪中師子騎來看洞裏潛龍放去休且曰知此意否要公不可捉死蛇耳師居北臺之龍門老屋數椽在萬山水雪中春夏之交流澌衝擊靜中如萬馬馳驟之聲以問妙峰峰舉古人三十年聞水聲不轉意根當證觀音圓通語師然之日尋緣溪橫約危坐其上初則水聲宛然久之忽然忘身衆籟聞寂水聲不復聒耳矣一日粥罷經行忽立定光明如大圓鏡山河大地影現其中旣覺

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

身心湛然了不可得說偈以頌之遊雁門兵使胡君請賦詩甫構思詩句逼塞喉吻從前記誦見聞一瞬現前渾身是口不能盡吐師曰此法光所謂禪病也惟熟睡可以消之擁衲跏趺一坐五晝夜胡君撼之不動鳴擊子數聲乃出定默坐却觀如出入息住山行脚皆夢中事其樂無以喻也還山刺血書華嚴經點筆念佛不廢應對口誦手畫歷然分明隣僧異之率徒衆來相嘲已皆讚歎而去嘗夢與妙峰夾侍清涼大師開示初入法界圓融觀境隨所演說其境卽現又夢登彌勒樓閣聞說法曰分別是識無分別是

智依識染依智淨染有生死淨無諸佛自此識智之分了然心目也師旣建祈儲道場遂遠遁東海之牢山慈聖命龍華寺僧瑞菴行求得之遣使再徵不能致賜內帑三千金復固辭使者不敢復命師曰古有矯詔賑饑之事山東歲凶以此廣聖慈於饑民不亦可乎使者持賑籍還報慈聖感歎率闔宮布金造寺賜額曰海印師詣京謝恩爲報恩寺請藏上命師賚送因以便歸省父母寺塔放光累日迎經之日光如浮橋北度經在塔光中行也師還以報恩本末具奏曰願日減餧羞百金十年工可舉也慈

聖許之歲乙未而黃冠之難作師住山十三年方便說法東海彌離車地咸向三寶而黃冠以侵占道院飛章誣奏有旨逮赴詔獄先是慈聖崇信佛乘勅使四出中人讒搆動以煩費爲言上弗問也而其語頗聞於外庭所司遂以師爲竒貨欲因以株連慈聖左右并按前後檀施帑金以數十萬計拷掠備至師一無所言已乃從容仰對曰公欲某誣服易耳獄成將置聖母何地乎公所按數十萬在縣官錙銖耳主上純孝度不以錙銖故傷聖母心獄成之後懼無以謝聖母公窮竟此獄將安歸乎主者

舌吐不能收乃具獄上所列惟賑餓三千金有內庫籍可考慈聖及上皆大喜坐私造寺院遣戍雷州非上意也達觀可公急師之難將走都門遇于江上師曰君命也其可違乎爲師作逐客說而別師度庾嶺入曹溪抵五羊褚衣見粵帥就編伍于雷州歲大疫死者相枕籍率衆掩蘿作廣薦法會大雨平地三尺癘氣立解叅政周君率學子來扣擊舉通平晝夜之道而知發問師曰此聖人指示人要悟不屬生死一着耳周君撫然擊節與之孝秀馮昌曆輩輩聞風來歸師擬大慧冠巾說法搆禪室于壁壘間說法

華至寶塔示現娑婆華藏涌現目前開悟者甚衆居
粵五年乃克住錫曹溪歸侵田斥僦舍暑門酒肆蔚
爲寶坊綃白全集攝折互用大鑒之道勃焉中興甲
寅夏師在湖東慈聖賓天詔至慟哭披荆返僧服
又二年念達觀法門死生之誼赴葬於雙徑爲作茶
毘佛事歲吳越禪人之病作擔板歌弔蓮池宏公於
雲棲發揮其密行以示學者自吳門返廬山結庵五
乳峰下效遠公六時刻漏專修淨業居四年復往曹
溪天啟三年癸亥宣化公赴召來訪劇談信宿公謂
師色力不難百歲更坐二十餘夏如彈指耳師笑曰

老僧世緣將盡幻身豈足把翫哉別五日果示微疾
韶陽守張君來問師力辭醫藥坐語如平時旣別沐
浴焚香集衆告別危坐而逝十月之十一日也曹溪
水忽涸百鳥哀鳴夜有光燭天三日入龕面顏發紅
鬚髮皆長鼻端微汗手足如綿僧徒驚告謂師復生
蕭公語余衰老赴闕跋涉二萬里何所爲哉天殆使
爲師作末後證明耳嗚呼知言哉師長身魁碩氣宇
堂堂所至及物利生機用善巧如日烜雨潤加被而
人不知山東再饑師盡發其困親泛舟至遼東糴豆
以賑旁山之民咸免捐瘠稅使與舉帥有隙嗾市民

以白艤作難群噪圍師府師緩頰諭稅使解圍不動聲色會城以寧珠船千艘罷採不歸剽掠海上而開礦之役繹騷尤甚採使謁曹溪師以佛法攝受徐爲言開採利害由是珠船罷採不入海而礦額令有司歲解制府戴公詒書謝曰吾乃今知佛祖慈悲之廣大也師爲余言居北臺大雪高於屋數丈昏夜可鑑毛髮堅坐待盡身心瑩然逞明塔院僧穴雪以入相携行雪洞中里許乃出當詔獄拷治時忽入禪定榜筆刺爇若陷木石逾年在雷陽聞侍者趣呼逮繫毒楚卒發幾無完膚此楞伽筆記所由作也師東遊至

嘉興楞嚴寺萬衆圍繞有隸人如狂易狀搏頽不已曰我寺西仲秀才也身死尚在中陰聞肉身菩薩出世附隸人身求解脫耳師爲說三皈五戒問解脫否曰解脫竟懵然而覺師之樹大法幢爲人天眼目豈偶然哉師世壽七十八僧臘五十九前後得度弟子甚衆從師于獄職納橐餧者福善也終始相依於粵者善與通燭超逸通暭也貴介子弟劄臂然燈以求師道現大士像於瘡痂中而坐脫以去者卽墨黃納善也粵士歸依者馮昌曆爲上首御史王安舜孝廉劉起相陳廸祥歐文起梁四相龍璋皆昌曆之徒也

師所著有楞伽筆記華嚴綱要楞嚴懸鏡法華堅節
 楞嚴法華通議起信唯識解若干卷觀老莊影響論
 道德經解大學中庸直指春秋左氏心法夢遊集又
 若干卷嗟乎師於世間文字豈必不逮古人有不逮
 焉亦糟粕耳師於出世間義諦豈必不合古人有不合
 焉亦皮毛耳惟師夙乘願輪以大悲智入煩惱海
 以無畏力處生死流隨緣現身應機接物末後一著
 全體呈露後五百年使人知有一大事因緣是豈可
 以語言情見擬議其短長者哉是故讀師之書不若
 聽師之言聽師之言又不若周旋瓶錫夷考其生平

而有以知其願力之所存也謙益下劣鈍根荷師記
 菊援据年譜行狀以書茲石其詞寧繁而不殺者欲
 以示末法之儀的故衆生之正信也銘曰人生出沒
 五濁世間生死之涂屹立重關重關峻復誰不退墮
 師子奮迅一擲而過濟河焚舟縣車束馬一鉢飛渡
 誰我禦者冰山蟄伏雪窖沉埋冰解凍釋水流花開
 光明四照上徹帝闇榮名利養匪我思存震霆赫怒
 我性不遷折楊木索說法熾然覺範朱峴妙喜梅州
 雷陽萬里謂我何求軍持應器橫戈杖錫毀形壞衣
 古有遺則大鑒重微靈照不昧屈徇之衣如施畫績

10 1 2 3 4 5 6 7 8 9

20

30

1 2 3 4 5 6 7 8 9

師之示現如雲出谷觸石膚寸雨不待簇雲歸雨藏
 山川日如孰執景光以窺太虛福德巍峨文句璀璨
 視此肉身等一真幻匡山不來曹溪不去塔光炳然
 長照覺路 天啟七年丁卯九月朔常熟幅巾弟子
 錢謙益謹述

憨山大師傳

師諱德清全椒人姓蔡母洪氏夢大士攜童子入門
 抱之遂娠及誕白衣重胞居常不樂俗年十二聞西
 林和尚有大德欲往從之父不聽母曰養子從其志
 遷送入寺時無極講經西林雪浪長師一歲先依無
 極見師如夙契十九從無極聆華嚴玄談至十玄門
 海印森羅常住處悟法界圓融無礙之旨切慕清涼
 之爲人自字澄印每於講會密察方僧可爲侶者一
 日見後架潔清思淨頭必非常人比見乃黃腫病僧
 每早起事必辦不知何時灑埽也故不寢以偵之則
 當衆方放參時已糞除畢數日淨頭病師問安否答
 曰業障身病已難支而饑病又難當每見行齋食恨
 不俱放下師袖果餌親之問其號曰妙峰蒲州人因
 相期結伴爲遠遊旣數日則已去矣更六年師至長
 安有稱鹽客相訪者長鬚髮衣褐衣入門卽問認否

師視其兩目忽記昔天界病淨頭也云爲山陰王請
內藏來師追妙師至河東山陰王留結冬訂刻筆
論向於不遷論未明旋嵐偃獄之旨忽閱梵志自幼
出家白首而歸鄰人曰昔人猶在耶志曰吾似昔人
非昔人也豁然了悟初師方七歲叔死叔母撫戶而
哭曰天耶那裡去也師愕然問叔身在此又往何處
曰死矣意死向何處去疑之未幾次婦舉子隨母往
視見嬰兒問母何從入嬌腹中母拍一掌云爾從何
入爾母腹中耶又切疑之自此死去生來之故耿耿
於懷至是如水漸泮矣明日妙師問所得師曰夜來
見河邊兩個鐵牛相鬪入水中去也至今絕消息妙
師笑曰且喜有住山本錢矣時伏牛山法光禪師在
王所示以離心意識叢出凡聖路學師深領其旨每
歎曰光師談論如天鼓音一日搜師詩讀之笑曰何
自得此佳句復笑曰佳則佳矣那一竅欠通在師問
和尚通否曰三十年來拿龍捉虎今日草裡走出兔
子來下一跳師曰和尚不是拿龍捉虎手光拈拄杖
作打勢師把住以手捋其鬚曰說是兔子恰是蝦蟆
光笑休去一日謂公不必他往願同老伏牛是相望
也師同妙師登五臺光以詩送云雪中獅子騎來看

洞裏潛龍放去休問其意曰要公不捉死蛇耳師言禪道久無師匠比見光師始知有宗門作略大方主人爲卜居北臺之龍門大風時作萬竅怒號意喧之間妙師師曰境自心生非從外來古人云三十年聞水聲不轉意根當證觀音耳根圓通初師日坐溪橋水聲宛然久之動念卽聞不動念卽不聞一日忽然忘身音聲俱寂自此衆響閑然不復爲擾矣人餉師米三斗日食麥麩和菜以合米爲飲送之半載有餘糧偶粥罷經行忽入定不見身心唯一大光明藏圓滿湛寂如大圓鏡山河大地影現其中及覺說偈曰

瞥然一念狂心歇內外根塵俱洞徹翻身觸破太虛空萬象森羅從起滅時年三十也悟後無可謂益乃展印楞伽經旣夙所未講但以現量照之少起識心卽不容思量如是者八閱月全經旨趣了然量中一夕夢入金剛窟石門榜大般若寺見清涼大師倚臥床上妙師左侍師趨入禮拜右立大師開示初入法界圓融觀境謂佛刹互入主伴交參往來不動之相纔說其境其境卽現自知身心交參涉入妙師問曰此何境界大師笑曰無境界境界又夢履空上昇入廣大樓閣瞻禮彌勒聞其說曰分別是識無分別是

智依識染依智淨染有生死淨無諸佛自此識智之
 分了然心日萬曆辛巳 神宗皇帝遣官祿 皇嗣
 于武當 皇太后遣官于五臺就本寺建道場訖癸
 未師以臺山虛聲難久居遂蹈東海之上易號慈山
 尋清涼疏所謂那羅延窟者卽東海牢山也 聖母
 以五臺祈嗣之勞訪求三人大方妙峰俱至命龍華
 寺住持至海上喻師尋建寺西山期以必徃又發三
 千金爲師建庵師俱辭丙戌 勅頒十五藏經散施
 天下名山 慈聖以其一送東海空山無可供奉命
 合官布金修寺 賦額曰海印是冬禪室成靜坐夜
 起見海忽身心世界當下消落偈曰海湛空澄雪月
 光此中凡聖絕行藏金剛眼突空花落大地都歸寂
 滅燭入室取楞嚴證之開卷見汝身汝心外及山河
 虛空天地咸是妙明真心中物全經觀境了然心目
 述楞嚴懸鏡一卷丁亥開堂說戒四方衲子日益至
 作心經直說以懸鏡文簡學者不易入始創意述楞
 嚴通議己丑爲報恩寺請藏齋送至龍江便道省親
 且欲重修本寺師出家處也乞 聖母日減膳羞百
 兩積之三年可舉 慈聖俞之甲午冬入賀 聖節
 命說戒于慈壽寺再請舉修報恩寺 上命徐俟明

年乙未逮師先是 上數惡內使以佛事請用太煩偶以他故觸 聖怒有忌送經使者因之發難遂假前方士流言擊登聞鼓以進下鎮撫司獄望風旨者盡令疏向所出諸名山施資十數萬計嚴訊之師曰媿爲僧無以報 國恩今安惜一死以傷 皇上之大孝平卽曲意妄承奉非臣子所以愛君之心也有死而已止供前施七百餘金而前所辭建庵金使者不敢復命師曰古人矯詔濟饑今歲凶何不廣 聖慈饑民乎令僧與使者遍散之僧道孤老獄囚各取所司印籍以復至是請覈內支籍代賑之外無他

上意解時相國洪陽張公暨諸當事營救甚力後張語人曰人知憲公爲大善知識不知有社稷陰功也衆聞之悚然出獄戊雷州侍御樊公繼謫問雷陽風景何如師方註楞伽經拈卷示之曰此雷陽風景也督府命住曹溪闢堂濬源行化之外普潤枯瘠癸卯達觀在京師適妖書發難下 詔獄訊以爲師之故檄還戌所因憶達師云楞嚴說七趣因果世書無對解者師云春秋乃明明因果之書耳遂著春秋左氏心法乙巳渡瓊海夜望郡城氣索然遂行謂衆曰瓊城將有災行後地大震陷城東隅暨官民廬舍仆明

昌塔壓碎師所寓樓先時郡士大夫競留師師不止故免丙午遇赦癸丑至衡陽遊南嶽禮八十八祖道影丙辰登匡山避暑金竹坪註肇論僧某以五乳貽師喜其境幽將投老焉爲達觀茶毘手拾靈骨藏于文殊臺丁巳下山弔雲棲說法淨慈之宗鏡堂日達千指歸閉關謝衆效遠公六時刻香代漏專心淨業著華嚴剛要重述圓覺起信直解莊子內篇註粵方伯吳公暨諸弟子固請復至曹溪者三壬戌冬至爲弟子戒期講楞嚴起信諸經論晚參示衆云老人穩坐匡廬今日踰河越嶺爲着甚麼爾曹慎毋作容易

想也癸亥冬十月示微疾韶陽太守挾醫問疾師不御侍者請垂一言師曰金口所演尚成故紙我又何爲自後不語端坐而逝初外道羅清以其教遍行東方絕不知有佛法師居東漸久其長率衆來歸開講大化遂遍東海嶺南佛法久廢海門周公攝南韶集諸子問道於師周鴻石問通乎晝夜之道而知師答此聖人指人要悟不屬生死一着公擊節歎服有龍璋者聞師論心異之歸謂其友馮昌曆曰北來禪師說法甚奇特因共請益師開示以向上事諦信不疑自是王侍御安舜歐文起梁四相等相率歸依士人

向慕法化大行雖上下崇禮奉爲法王而有爲之事
 雀角至再然當事有結轎則必乞師解之稅使者惡
 大將軍因與苦闘艦運米新督府閩人也公子舟次
 白艦之旁藉口以大將軍資公子行閩士民數千人
 沉公子舟持戈圍帥府甚急帥令中軍詣關涕泣求
 救師遂破關往謁從容開曉使者悟俾散亂民師先
 往大言於衆曰諸君所爲欲食賤米耳今犯大法當
 取死卽有賤米誰食之耶圍乃解會城以寧復甦採
 珠之擾其在東海勅賜殿成勢家冀奪道場構方
 外黃冠稱侵其道院事下萊州無賴數百喧競合圍

師令侍者他往獨徐行其中首一人舞銅牌利刃出
 其鞘凝殺師師笑視之曰爾殺人何以自處其人氣
 索收牌刀圍行城外二里許將東西行師躊躇請首
 者同至寓處閉門解衣磅礴談笑自若取瓜果共歎
 之一市喧云方士殺僧矣太守遣多役捕之彼衆惶
 懼皆叩首求解師曰爾勿懼亦勿辯第聽吾言太守
 問狂徒殺僧耶師曰未也來捕時僧方與彼同食瓜
 果耳太守曰何謂曰市閔耳太守命三木師曰將欲
 解散之乃故拘之耶太守悟但令他方驅之不三日盡
 解散師於詩文天才駿發少年入長安王元美諄諄

誨以詩法師不答瞪目視之敬美一見笑曰阿哥輸却維摩了也論曰莊生云以聖人之學教聖人之才其亦庶乎其可矣余以辛酉入五乳訪師者三語甚洽余謂師用世異才也贈以詩曰出世還應用世人師不語其意深自得又謂師老矣何不加意嗣人答云須其人精心求之我求何益初師在海上卽墨黃生納善年十九參究堅切脇不至席對大士破臂然燈保師速還火發瘡痛日夜危坐持觀音大士名三月乃愈痂痕結大士像睂目身衣宛然如畫求隨師出家師不許生乃曰弟子打個勦斗來師又何能

止我乎又明年竟坐脫此豈所謂其人耶非耶其在嶺南則馮昌曆五乳之患難不二者爲福善

賜進士出身廣東等處提刑按察司按察使會稽陸夢龍君啟撰

憨山大師塔院碑記

嶺南無佛五祖所譏而能大師出其無根之智剖三光而剗五獄掃軌易嚮以師百世何其盛也玄風既衰法地亦墜積劫之因是爲開始師與達觀滌源曹溪之盟結想未紓師乃被難達觀聞之驚曰憨公已矣此願曷酬而師以主恩佛佑流宥五刑適赴其

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

地雖業累所纏然亦因緣之頑力也初至解紛上將督府德之願爲護法先時道場土宇割裂侵并流徒肆爲屠沽至是檄縣期以三日盡之因謂師六祖腥羶已爲滌然生靈塗炭請師救濟其一珠船千艘皆海上巨盜資以欽採之勢踰期不歸橫掠海上吏不能制其一礦役暴橫掘墓破居師乃徐動榷使啟誘信心嚴約珠船撤所遣役歸有司歲額解進民自此安枕矣遂闢祖庭立義學登壇說法自宰官文士下及販賈遂昄依改徑拓產歸所侵田以屠肆爲十方旦過寮設庫司清規井然如官府法歲大饑疫

勸施掩骼作濟渡道場夫無著之機棄絕聖智有爲之化波潤津梁大小精粗至人畢貫所以君子契其精玄小人懷其樂利沒而不忘其在斯乎玄圃蕭先生北上入訪因遊次謂曰已爲師竟一片福地問何在曰天峙岡師戲云天峙岡宰相定穴非吾法王孰能居之旣別卽示微疾數日而逝甲子春廬山弟子福善等至請龕還廬嶺南弟子歐文起劉起相暨山寺大衆議留乃闡卜之三闡皆得留字韶太守張三星爲建塔院卽所指天峙岡也然龕卒歸五乳是爲衣履之藏銘曰聰明聖智道不涉焦金腐芥世喪裂

大師精神十方徹撓挑風雷美日月波瀾不蕩光不滅曹溪中流祖源邊刊山滌源九州列洪鍾在函無扣歇水逝風行非續絕曹溪五乳無跡轍與塔而三共巒業 天啟七年六月 賜進士出身廣東等處提刑按察司按察使會稽陸夢龍撰

本師憨山大和尚靈龕還曹溪供奉始末

謹按本師以萬曆丙申逆緣入粵生平履歷備載于蕭玄圃吳觀我錢受之諸名公碑銘亦旣逗漏不少今所紀者自廬山迎靈龕還曹溪及開龕漆布始末也吾師弘法一生精神半在曹溪備載于中興錄暮

年歸休于廬之五乳天啟壬戌起相同堂主本昂等堅請師南還以癸亥冬示寂于曹溪五乳眷屬知微善公欲迎靈龕歸廬龕前拈闡三拈皆得留字于時宗伯蕭公捐貲會本道我齋夏公韶府張公暨遠近繙白弟子及十房僧衆崇建塔院善公者本從師于患難九死之餘孝誠篤摯邀請吳越諸宰官皈依師門者具書當道何制臺下令強迎歸廬乙丑之春正月也崇禎庚辰起相承乏司李瑞州入山掃塔始知形家異議旣入塔復啟殯卜地因憇壬戌侍師于廬師別詩云一片遠心遡流水相期端爲不傳衣又曾

于衆中授記云爾他日爲兵部權要之官當爲我修
 蔡家先墳二十年來一官拓落旣難提石上之衣又
 罔効包土之力嘗懷內疚忽猛省曰師靈未妥倘了
 此段公案其於修墳不既多乎遂謀力任南迎之役
 長男珵輝隨任因力贊之癸未秋楚寇震鄰兵燹是
 虞嗣孫慈力廣成等用予言龕前拈閻三闇皆順起
 相解任將南歸遣男珵輝代迎有晏生日瑞者曾物
 色之兩造中賞其膽智可任渠亦堅請効勞因命之
 往康郡糧館亦留都人難之曰大師吾梓里也彼能
 迎我獨不可留乎相先托同鄉康郡司李廖公文英

爲東道主值廖奉臺檄辦事淮安已在舟中矣爲風
 所留幾八十日晏生懇之廖欣然許諾一夕風轉南
 遣人趣晏曰風利不泊遲則自誤值晏痢病動轉不
 得業揚帆北渡晏生已失望矣是夕石尤風大作又
 逆遲廖舟還故處晏生手額曰大師之靈也於是檄
 星子縣署篆寄公主其事牌行山中衆莫敢抗瑞郡
 守戎金國柱康郡守戎胡宗聖皆遣兵迎送旗鼓導
 引出山寇警日迫河道梗澁六舟南邁途中值賊客
 舟皆被邀截獨靈龕船得風揚帆徑去鈎竿皆著手
 不得如是屢經險阻履險卒夷川嶽助順何莫非吾

師之靈也是年冬仲朔二日靈龕到山山中大衆歡聲如雷以爲從天而下也晏生及嗣孫慈力爲余言龕靈異甚初出山及度嶺皆四人界之比到漾裏登峯夫力倍之猶勉強此何說也予謂老人家顯異欲以內身出現乎擇吉入塔在甲申九月而荒益頻仍復值燕都大變崩心痛悼欲先期入山省視未遑也有宋總戎紀者語僧遠蒼曰大師名喧宇宙豈同餘人金剛之體保無缺漏請開瞻禮于四月廿八集衆拈闍許開開則道骨如生儼然端坐不傾不倚髮甲皆長衣服鮮潔白綾坐褥無半點瑕數珠絨串若

新大衆歡呼皈命頂禮觀者如堵後數日前吏部尚書李公日宣韶府黃公鋐者入山隨喜共作證明始信肉身大士應緣度世前有大鑒今有本師先是卓錫泉久竭郡侯黃公留心法門百計搜剔比靈龕旣啟泉則自湧應若影響豈偶然也起相與余宗元糾本府長春社中緇白善信設闔山大齋以重陽日入山廿五日齋僧十月初十日漆布陞座十房戶長長老耆舊塔主堂主及長春社護法居士具僉帖請嗣孫慈力等守奉塔院香燈宋公首捐五十金漆布且請李公撰募疏謂塔院襟脣未舒爲修瓶及香燈田

產之費制臺沈公業題百金此皆與本師夙植般若之緣故能于末後一着各出手眼爲千秋豎光明幢也起相綿力何幸躬逢其盛爰識其始末如此

崇禎十七年十月吉日原任江西瑞州府推官順德

菩薩戒弟子劉起相頓首謹識

奉輓 憨翁禪師圓寂

蕭雲舉廣西人少宰

鼓棹雙林扣夕扉故人把袂洽心期十年契闊龍華會萬里音書雁斷時茅結牢山歸北海花開庾嶺向南枝衡陽地褊袈裟潤匡嶽雲深杖錫移臺鏡本空觀自性風幡忽動想能師幾回涼月倍清夢一宿秋

風對故知隱几談天收密義揮毫見地掃群疑久無粘縛心常定空有慈悲首重垂落葉秋深忘語倦聽鍾夜半說心危每嗟塵世心常苦更到禪臺路轉岐法語聽來堪唯唯客程催去故遲遲老知湖海應難遇會屬機緣忽漫離鴈過寒山秋影盡馬嘶曹水去聲悲尺素傳書人北面閣黎聞訃淚交頤法門摧棟材難得覺海藏舟事莫追睡蝶遠還纔入夢猶龍矯矯欲何之晤來已是經千劫化去何煩贊一辭忘我非貪無相好觀空莫詫有形竒回看峰色林端寺夢想潮音篋裏詩圓寂那曾分去住莊嚴不改舊威儀

抵愁法侶應稀少託鉢傳衣更屬誰

奉輓

憨翁大和尚有叙

吳中偉左方伯
海鹽人

憨山大師禪宗龍象余治兵湖南舊展叅詣庚申春再承乏嶺表道經曹溪頂禮南華祖像僅蔽風雨雖巨材山積而龜曝鶴飛丹青剝落徘徊久之慨然太息詢厥所以老比丘答言此我憨大師未竟業也安禪七日金地將完謠搆三途法輪中輟言罷掩抑悲不自勝予重憐其意語之曰若等真思大師予當爲若招之比丘輩咸各歡喜無量投地稱謝遂重趼千里殷勤故請始於比年某月再入曹溪則僧輩

已三詣大師而予亦三致書師矣卓錫之日法訊見貽薄宦糾縛未遑酬次每念他日北歸庶幾從容化城仰參心諦而法臘已滿遽登涅槃俾予數年所懷竟成虛想夫金剛不壞則大教常流石電難延則肉軀等盡予悼宗風之永寂哀玄義之將頽感往多哀傷今欲絕攬筆成誄情見乎詞矣

歸盡天龍有大師講壇花雨落遲遲厨中法膳慈宮出嶺表恩流聖主知鷗鳥宰官疑玩世旃檀海藏有經時是誰高足如迦葉把撰遺疏痛所思曹溪滴滴泣南華當日親承坐具紗心印獨傳無一

字地金重布有三車林風月掩床頭火穀雨煙消定後茶末法中興還更墮低徊雙樹獨長嗟

識記南宗歲已干道場重此更安禪法流心在無窮

悟祖去衣藏不再傳泣斷比丘黃葉下靈埋鎧子白

雲邊應留遺教經同佛猶自中流得寶船

蒲月當年一試叅版依初地憶湖南衣從白捲身常淨教演青蓮舌再含金版譯窮經幾部銀釣書就祖千函予曾刻師楞嚴通議師亦爲予手書祖像贊傳是誰檀越真師負三度書招祇自慚

過匡山奉弔憨山大師

王思任

山陰人

七峰絕頂開巒蘿葛窮時利石攀溪古瓏玲難窮
截教人猶自聽憨山

靈光作線一相牽八里庄前二十年今日拜師猶骨
在知師原是古金仙
賜環炎海主恩多鱷浪蛇雲伏幾魔遮莫靈山因
道力空餘好相聽彌陀

治任千般爲一龕曹溪廬阜若何叅早知風月猶擎
架一火燒時沒得擔

奉輓五乳大師

博山後學大艤

象王跡應瑞蓮開五乳峰前吼若雷今日樹煙何颶

魏紫雲旋入白雲推

南華福地塔全身脚底猶披五乳雲柱杖攬渾清世界不知得法幾多人

哭五乳大師

弟子福能

憶斷南華歸去來那堪已脫舊蓮胎人誰得體應成笑我未忘情自合哀荷法從今皆弱質論文視昔幾雄才可憐孤客餘雙眼遙對青山泣草萊乍得歸依雙徑山師資可想鶯峰間幾堪玉樹蒼苔瘞即使香臺末路還語對石泉分哽哽涕當風葉墮潛潛印心四卷楞伽在棹臂何人已出關

泣對緘書轉不平空於手澤訴歸盟相逢未惜懸千載白棄須知負一生推古但云携履去臨哀誰解作驢鳴蕭蕭客舍殘冬雪點袂依人若有情淚灑天涯寄弟兄先師遺囑太分明鬚眉五老堪摩擬腰脊三梁自現成紅葉鄉人雙眼血白雲弟子一心旌於茲領取拳拳意何必高談論死生

寄憨大師曹溪法眷書

海印白衣弟子虞山錢謙益致書于憨大師曹溪塔院住持諸上座師兄恭惟甲申之歲大師真身自五乳歸於曹溪迄今十有三載矣某游經喪亂萬死一

生視息僅存草土自屏既不能襍被腰包躬埽塔院
又不克齋心頂禮遙致瓣香仰負劬勞俛摹記荆蹠
天蹐地歎愧何已唯是多生承事畢世皈依布髮未
忘其宿因失乳久思夫慈母此則海墨難盡劫火不
灰我大師固當於長寂光中重加憐慤密爲加被者
也粵自法幢傾倒末刦凌夷師子逝而野干鳴龍象
寢而妖狐熾家家臨濟箇箇德山宗師如焚付拂如
葦而又構造妄語侮慢聖僧謗紫柏則曰本無師承
毀大師則曰但稱義學聚聾渠瞽惑世誣民法門之
敗壞未有甚於此時者也舉世飲狂井之藥而有一

人不狂舉世怖曉鏡之頭而有一人不怖單撐孤立
風雪當門此一人者或者護世四王密諦力士假手
是人爲如來使使之屏除魔外不斷佛種而我大師
慈心悲愍普施無畏亦豈無厚望於後人與諸上座
與某緇白不同同出大師之門並受遺囑居今之世
隨波逐流坐視斯人中風狂走搖手閉目不爲拯救
亦何以稱海印之真子與魔強佛弱俗重道輕智眼
無多法城日倒未知諸上座能不河漢吾言否也今
所欲亟請于座右者近代紫柏雲棲皆有全集行世
大師夢遊集嘉興藏函但是法語一種其他書記序

傳之文發明大法者有其目而無其書聞大師遺稿
 藏貯曹溪卷帙甚富今特爲啟請倒囊相付當訂其
 誤舛削其繁蕪使斯世得窺全壁不恨半珠人天眼
 目刹塵瞻仰斷不可遼緩後時或貽湮沒之悔也又
 大師著春秋左氏心法乃發明因果之書常自言曹
 溪削藁時燈前燭下徵求案斷魂魄可追毛髮皆豎
 以今世時節因緣正當開顯此書用以革頑止殺撈
 擶劫濁追思大師往昔付託良非聊爾流通之責胡
 可逭也伏祈諸上座合力搜羅悉心採集片紙隻字
 罔有闕遺健椎集眾昭告大師真身之前舉授輶車

詔使鄭重郵致俾某得藉手撰集以告成事此則法
 乘教海千秋之耿光非及門一人之私幸也大師五
 乳塔院濫竽載筆南海陳相公曾爲題識勒石南華
 甲申已後歸龕事蹟山門當有實錄不揆蕪陋願考
 覈作第二碑以備僧史某年七十有五誓以西垂之
 歲歸命佛門會台賢之異同破性相之岐執闡揚遺
 教弘護真乘庶幾勉餘生不負大師摩頂付囑至
 意俟文集畢工少有端緒當爲文一通啟告大師冥
 機密感念茲在茲而今固未遑及也遙望雙峰焚香
 作禮嶺海迢然如在床席天寒夜凍琢冰削牘意滿

10 1 2 3 4 5 6 7 8 9

20 1 2 3 4 5 6 7 8 9

30

1 2 3 4 5 6 7 8 9

楮晤不盡所云歲在丙申十一月長至前三日某和南奉啟

右錢牧齋宗伯訪求憨山大師遺稿書以託龔孝升中丞者頃携至海幢華首和尚觀之彈指讚禮益歎錢公能不負師龔公能不負友而兩公皆能不負佛所付囑也使授諸梓命令釋跋其後嗚呼斯道凌夷於今已極良由信根輕鮮忘法本而背佛恩其視慧命斷續之間若越肥秦瘠笑啼皆僞起倒隨人請以此書正告天下萬世之爲法門後昆者知錢公所以盡心於大師之心與龔公所共

弘護之心與和尚所共流通之心皆共出于三世諸佛大悲大願之心皮下有血人觸着便痛不隔一絲危涕旣零忘身非險卽生佛慧命實嘉賴之豈止爲大師堅立光明法幢而已時丁酉春正月穀日華首門下弟子比丘今釋跋

台諭慈大師全集泰處署中搜羅咨訪非力所及適金道隱在此知中丞傳台札於海幢法侶其堂頭宗寶老人歡喜讚歎焚香設拜屬道隱題跋付梓布告諸方俾凡有收藏大師法語者單辭片紙皆來聚集現在數種附中丞行劄此外更有所得

泰當爲續上也門人萬泰頓首

憨山大師全集舊序

余嘗思維世聖賢立身一代或開創或繼述或守成或重興或救弊其用心於制作之微事無不周義無不備使千萬世下有能尋其旨趣皆可因之而振起也此非古今之大經大法哉於是更進而思之夫經世聖賢尚能以身盡一代之事以道開萬世之心况我佛祖出世爲人以超生死性命之法而化凡聖迷悟之心其示現普門感應異類者豈不能續三世之慧燈傳大千之種智乎余於憨山大師見之矣大師

悟門與教化之廣大已見於自己著述與諸明眼傳記贊銘之詳舉世莫不知爲再來肉身大士矣余何能贊一辭蓋痛念法門而有感焉大師當此宗門凋落之際方與雲棲達觀二大師相爲鼎立以悟宗門之人不據宗門之位是預知宗門將振故爲宗門大防獨虛此位而尊此宗使其狂妄僭竊之徒自生畏懼而不敢眇視輕賤此其心又奚啻程嬰杵臼哉嗚呼有三大師如此光明赫奕於前而後世尚有僭竊不恤爲大師之罪人者寧不大可慨與雖然孔子作春秋正萬世名義雖不能使萬世之名義皆正而有

不能正名義者亦何能逃春秋之誅余昔年見大師贊予壽昌先祖及撰塔銘卽突出大好山千里遙相見之句已知與先祖把手共遊向上一路矣至於平生說法著作曲盡一代時教始終本末全體佛心全行主意其提唱拈頌及指示偈語曾何減於古人曾何讓今人天下後世自知師實祖位之人不居祖位豈可以師不自居卽爲非祖位人乎師沒後二十二年而全身不壞與曹溪六祖開創重興無有一義其進於維世大經大法而能續法身慧命誠無不周無不備也茲大師法孫堅如欲摹刻師全集乃特請爲

序而贊成之予嘉其爲法忘軀之誠因述余所仰慕感慨之思云爾天界後學道盛和南題

憨山大師口筏引

客歲冀中丞孝升入粵虞山錢宗伯屬收憨山大師遺文維時華首老人與鼎湖棲壑和尚袁集法語及諸論述附星輶以往珠海牟尼光已照映吳山淛水間矣余從友人黃秋聞又得遺言一則乃師中興曹溪祖庭時與鄧生敷說所謂口筏者也師信口說法此筆千言文不加點皆從不思議中流出其示鄧生言下指點縱橫穿漏從來單提直指未有如是之簡

10

1 2 3 4 5 6 7 8 9

20

1 2 3 4 5 6 7 8 9

30

1 2 3 4 5 6 7 8 9

捷透快者師與雲棲紫柏同時稱二大宗師弘皆親受記荔雲棲以低眉作佛事師與紫柏以努目作佛事而其作略大都從五臺水觀中來故其楮墨所傳莫不有千峰積雪萬壑轟雷之雄槩此片紙亦具見一班矣刻成仍寄宗伯俾補入全集中而敬書數語于後丁酉蒲月中州曾弘合掌言

憨山老人夢遊集卷四十之下終



10

1

2

3^{mm}

4

5

6

7

8

9

20

1

2

3

4

5

6

7

8

9

30

1

2

3

4

5

6

7

8

9

